



程端明公洛水集卷之二十一

致語

建康鹿鳴宴

春日下詔書處處蒐揚巖谷秋風動霄漢人人振刷羽  
翰一登天府獻賢之書洵講公堂勸駕之燕南則七閩  
常布之地東則三吳文物之鄉凡戴堯天盡遵周典唯  
是千年之王氣實爲六代之帝家自控長江十萬之師  
不減秦關百二之勢起一世明堂清廟之老秉九州繡  
斧金鉞之權適當大比之時來主賓興之事凡問春官  
群試看有此金陵座主無豈非多士之獨榮懸知他郡

之難比新貢省元天與一段秀氣身負千人雋聲能賦  
爲大夫上薄楚騷之光焰明經補高第下陋漢儒之異  
同幾年結就雲梯今日來遊月窟捷書夜至尉辛勤教  
子之慈親課誦更闌動多少答兒之隣父粵有回翔舊  
舉騰踏英遊家家自握靈珠步步同登寶塔某官百尺  
竿頭饒一步千佛經頂上三人傳誦人間縱橫禮樂三  
千字徹聞天上卓犖聲名四百州要從白鷺清溪却步  
紫樞黃閣不但秦淮一條水寸波不驚坐令淮甸二十  
州高枕安卧腹中自有百萬甲華陣獨掃千人軍恩意  
洽於營屯已嚴武事禮貌優於庠序益振儒風爰因暇  
時更舉縉禮屈金鼎調元之手歎蟾宮得意之人平時

俎豆雍容已宣禮樂詩書之化今日尊壘閑暇更將笙  
簧幣帛之誠某官列宿應郎官使星臨吳地前朝相國  
之胄風采自高中興名臣之家典刑故在並擁皇皇之  
節來光秩秩之筵旗幟精明賓僚整暇况坐中有鯨海  
釣鰲之客而席上皆玉堂吐鳳之人舉酒一言來年三  
月太宗伯以姓名來上新進士蕭衣冠以前序立大庭  
躬承聖問毋如公孫子之阿世其如轅固生之正言凡  
異時得君而行之皆今日悉意以陳者又况石城虎踞  
鍾阜龍蟠雙闕崔嵬大江吞吐代生人傑氣稟地靈老  
鳳飛來尚想半山之松竹靈鼈穩占猶聞東閣之芝蘭  
何止狀元宰相之有人且復熙寧紹興之近事勉光前

躡無遜昔時相期來春好在魚翻三級何妨今日且作  
鯨吸百川氣壓江淮事光圖謀幸侍北門之宴請陳西  
郢之詞

河南貢士紫荀詩不比尋常貢士時一老堂堂強國棟  
四筵濟濟瑞庭芝傳聞座主趨璜召恰與諸生赴詔期  
宴罷瓊林如謁謝請君懷刺鳳凰池

建康春教

虎城龍阜控長江地勢之雄鐵鉞瑯戈侈太府軍容之  
盛雖在聖朝偃武之際不妨春田蒐事之常某官制九  
州之兵擁七尺之節聲名動蠻貊頃時嘗問於度年威  
重攝單于他日更詹於漢相三年管鑰四治戎行百將

同心三軍一勇動搖山嶽呼吸雷風蛇向敵而蟠隱隱  
圖中之八陣馬從背而出片片面前之六花進若電馳  
退如雨寂幕府山北空餘當日武帳崗朱雀航邊不數  
昔人麾羽扇而又適丁今歲一整常須十萬張穉角之  
弓三百步僕姑之箭熊旗兕甲影搖汴水之波鶴膝犀  
渠光奪燕山之月士氣益倍日暮未酣然菜公乃出填  
北門恐不免使人之問使中令若叅決巖廟必令知中  
國之威某等久窺投壺之歌頗諳舞劍之樂輒哦韻語  
助喜凱旋

朝來百鼓殷軍門知是元戎肅萬屯殺氣直摧龍尾壘  
英風遠薄闔場村從今具卒精成勇却看燕兵脆可掀

好入廟堂禪聖畧指麾諸將定中原

聖節

乾道盛際夙開夢日之符嘉定熙辰載叶旋乾之度欲  
獻魯山之曲盡哀嵩嶽之呼恭惟剛健法天清明若日  
橐弓戢矢陋秦漢之武功履革衣綈躬唐虞之儉德喬  
戎革面狼子易心形氣叶和清寧並貺五穀熟而人民  
育三光全而寒暑平米斗三錢端類四年之正觀露囊  
五日又當今歲之千秋無懷封山黃帝禪亭長見太平  
之盛子晉吹笙安期奉棗莫量汗漫之期某等際運半  
千去天尺五慚無妙語仰奉昌辰

雉尾差參寶扇開九霞雙闕聳蓬萊霜清法駕黃金殿  
雲擁仙班紫玉盃天上剖符初繞電人間作頌已鳴雷  
長生紀錄知多少瓠子澄清一萬回

王母

奉玉皇之寶篆有王者與翻佩女之雲旂來人間世雖  
縹緲虛無之際皆涵濡覆冒之區遙詹於穆之尊密獻  
長生之訣恭惟來從仙闕下撫塵寰土圭測而陰陽和  
宸極正而璿璣運農祥霽色景緯宣明天無風而海不  
波星連珠而月合璧時也清霜戒曉愛日烘晴桃開十  
月之花梅綻小春之蕋堯眉誕秀舜目開祥爰因閒暇  
之時共享太平之福上奉重闈之壽下均四表之驩已  
聞嵩嶽之如呼又見羨門之來謁臣妾胎身仙骨結屋

銀臺雖周穆王張宴於瑤池間從屈致而漢武帝塗香  
於萃殿竟是虛傳惟真主之應期寔上帝之有命故蓬  
萊三十萬餘里不憚其遙而天皇一萬八千年願先以  
告洊敷鴻寶益衍龜圖

青鳥銜餌海邊來報道群仙浴佛田玉侍雙成開翠箔  
雲冠七勝下銀臺萬年黎角丹方轉千歲冰桃花欲開  
更待丹成桃熟後却來親奉紫宸杯

前筵勾曲

百世基圖光胙聖神之主九天雨露恩濃帝王之川上  
奉台顏後部獻曲

醉蓬萊

望皇都清曉瑞日祥烟洞開闔闔一朵紅雲映重瞳日  
月萬歲山高九霞杯暖正想宸游洽絕塞庭琛重闔天  
笑年年僊闕韶鳳徘徊蒲魚演漾鎬酒恩濃龍蟠建  
業玉琢麟符分付人中傑莫國安民持將祝壽樂作君  
臣悅看取頭廳押班稱賀明年天節

後筵勾曲

天容不老千齡已祝於堯年地限無邊四海均聞於舜  
樂至和一鼓萬象皆春上侑清歡後部獻曲

茶詞西江月

歲貢來從玉壘天恩拜賜金奩春風一朵紫雲鮮明月  
輕浮盞面想見清都絳闕雍容多少神仙歸來滿袖

玉爐烟願侍年年天宴

湯詞鷓鴣天

飲罷天厨碧玉觴仙韶九奏少停章何人採得扶桑椹  
搗就籃橋碧絳霜 凡骨變驟清涼何須仙露與瓊漿  
君恩珍重渾如許祝取天皇似玉皇

祝版

靈湖王廟禱晴

蕭惟靈祠去縣里所某之來此亦既兩年而莫知有神  
于此何異懷材抱藝之士宅深居隱而人莫知也夫四  
月維夏女神鼓歌以司天和其風清明物生軫軫宜也  
乃雨爲霖上霧下潦穡夫桑女俟命須臾神其帥先百

職奮發威靈使蒙谷之日浴于咸池拂于扶桑午于昆  
吾祥光赫曦彌滿天地間則豈惟斯民實所嘉賴而神  
之威靈繇是暴白千萬斯年昭報無斁寧不甚偉某無  
似愛人澤物之志每切卷卷敢再拜以私于神神其惠  
顧

消蝗

螟螣蝥賊均謂之蝗得陽則生得陰則藏今白露既降  
而濁暑未消鬱雲猶溽此蝗所爲作也入夏以來賴神  
降嘉先黍後種亦既堅好何物爲孽忽生其間銛喙如  
鏃戕我垂成神其忍諸某無狀切自慕於魯恭之中牟  
戴封之西華使蝗不入境而未敢焉至於掃除洗濯秉

昇炎火豈田祖所能獨任哉惟明神降靈實終相之

祈晴

頃嘗請雨今復祈晴若無厭矣然握雨暘之權而司民物之命惟神能之不祈哀於神而誰告矧惟今茲璽方入益麥已覆隴神忍不加念而使前功頓虧乎惟神掃除積陰澡沐新陽使祥光下炤而民物熙愉神之賜也吏之望也

謝雨

乃月二日以雨請于神越五日亟垂嘉應物猶有不足之意也七日之夕天地晦冥雷電皆至開決河漢澎湃而下濡枯吹生澤流無垠敢忘神之惠乎雖然一歲之事今開端爾繼自今茲陰不僭陽不愆允謂時若以訖有秋此神始終之賜邦民無厭之請也

祈雪

候應二陽瑞慳一白恭承帝命虔請佛慈伏願黑風翻旂素電飄袂輕掣寶藏散作漫空之花普爲洹沙催起連雲之麥

諸廟祈雨

農之施功秋則望歲今既七月垂穎在田乃至旬時亢陽不雨惟神監止將害垂成呼喩之間豐穰所繫願均遠邇咸獲流通豈惟此邦獨受大賜俯陳懇惻仰冀照臨



謁先聖

大極合德斯文六經邑祀為僭先儒著明不佩其訓胡  
祀之歆庶與諸生退而服膺

充國公

優入聖域具體而微侑食終古在寢當時仰止德容盍  
克已私

鄒國公

斯文中興正統獨傳異代同心配此潔蠲盛服齋明治  
然充然

社

邑之有社寔司此土東風仲日吉日維戊土膏方興匪

神孰祐

后土氏

昔平水土下澤土丘民奠厥居物生已稠於報何有潔  
此明羞

稷

民為邦本食乃民天神寔專之是用吉蠲相我穡事實  
為豐年

后稷氏

教民稼穡蒸民乃粒豐功在人千載一日農田星明有  
馨其苾

諸廟

神與吏皆天子命之以爲民而分幽顯之責者凡吏之所當爲者不敢不勉至若水旱疾癘神之所以司諸隱者其惠嘉之

洪清之遷葬其祖尚書公中孚

某竊聞之庸庸者狎表表者折汙汙易全皓皓多缺由古而還悠然一轍秀拔黃石名塞青霄燕雲一疏萬古英標于何卷石寄挾山腰有羨令孫出幽遷喬顧後植屏屹屹巨嶽萬馬千兵如從天落三驛盤旋乃鍾于麓前朝獬豸卓立步廊前高後低昂昂堂堂至是成象乃若園光右列千筆左排萬戟他日偉人再見黃石歲在丙申輒贊其決旣窆一卮大峰三至泂酒臨豆如覆如饗咸曰異哉十日所睹厥旣越月如寐如見風骨嶢嶢衣冠肅肅如慰如謝三揖乃退尤異也蓋公言言烈烈千載不磨仰從列聖之在天嘿祐炎圖之千億更流後昆同扶皇極有契如龜眎此銘勒

青詞

保安

十萬珠宮藐在紫清之上三千金簡流傳浩劫之間祇按靈科仰干神造竊念臣一紆縣綬兩易歲符農扈豐穰園扉清淨匪資眷佑曷降嘉休去春昭報之儀因仍他故今歲潔蠲之薦又復愆期雖戴寬隆不勝怵迫輒紆單款爰卜中元伏望具闕雲駢玉京芝蓋少回仙馭

一顧熙壇潢汗行潦以自消蓋爲民而請命霜雪雨露無非教頌與物以爲春

乙亥天慶三省消蝗

涸澤三時已被發倉之雨群飛萬翼尚虞傷稼之蝗方仰蒼於洪私更俯祈於大造伏念臣等代天莫展畏帝實深荷魚宿之澄光嘉生有潤頌蛇星之歛彩孽類無遺

鹽官禱海

天相民居奠于下土海鎮坤壘長于百神凡有阡危敢忘哀籲伏念鹽官之境習罹潮汐之蓄闔縣千廬惴惴爲魚之慮良疇萬頃駸駸淹滷之虞臣食息熏心匍匐

請命仰神龍之有位暨水府之群司監此微衷降之太惠風濤受令寂無衝噬之憂浦淑還沙永賴扞防之固嗣新祠宇祇荅靈休

祈退

富貴世之甚欲或不存焉貧賤士之同羞有甚於此人所取舍天則從違伏念臣粗攷古今頗知經理因自量其才力知亡補於事功怵惕不皇俯伏以謂愿辭祿秩幸衍年華此去一封儻遂乞身之請他年三徑敢忘稽首之歸更期未殞之年益廣好生之念

疏

祈雨

八蠶方眠雖惡溽潤九龍已起宜現神通仰絳闕之清  
嚴蒼紫宸之慘惻伏願驅馳神駿吹動法蠶頌於春夏  
之交時賜沾濡之澤十日風五日雨無復愆期小麥青  
大麥黃訖臻樂歲

治平寺消蝗

若昔如來曾於舍衛見一大火宅有百種惡蟲狐狸夜  
千蚰蚘蝮蟻方聞蘭啜盡成蓮花矧此螟蝗害我禾黍  
言念佛父爲世鑿王伏願發大慈悲現大威力凡屬法  
界非法界一切驅除使有足蟲無足蟲悉皆消滅

治平寺祈雪

我聞菩薩昔在祇園頃刻莊嚴彌漫世界散雪圍之一  
尺現寶花之萬重孰閔衆生是依諸佛下白雲之尊者  
瞻皓采之如來展兜羅一色之綿開蒼荀諸天之飯湏  
彌山上願睹毫光闡浮國中普資福利

寺觀祈晴

一雨過時雖民情之易怨微物失所亦天意之必矜不  
勝迫切之私冀動高明之聽伏念三農之急莫如五月  
之時蠶盎方繰最惡溽潤麥畦欲刈尤便晴明乃罹淫  
潦之災立見前功之廢伏願捲豐隆之旆藏之西郊推  
羲和之車出之東谷庶令動植咸被照臨

瑞慶節開啓

明堂配帝方承錫貺之敷皇壽齊天更冀珍符之昇先

虹沅之一月衍虎拜之萬年恭頌契道玉虛纂圖金籙  
冰天華髮咸歌偃武之詩香案袞衣長睹豐年之瑞

功德

十月爲陽月祥開五百載之期九皇首天皇坐閱萬八  
千之歲請壽猶開於華俗祝休敢後於臣工恭頌永作  
民極丕承帝休雲起泰山長散九天之澤日升暘谷普  
舒萬國之明

滿散

霜清猗殿新騰玉色之暉香靄梵宮共祝金剛之壽大  
啓諸天之供普同率土之心恭頌仁覆慈雲智光惠日  
一塵不警落旄頭於昴畢之間萬歲爲期明壽星於角

亢之次

上梁文

雲溪上梁

封侯起第一日事苦未湏忙栽花種竹十年成亦嫌太  
晚已是半生行屋客豈應終欠蓋頭茅重憎群蟻之銜  
輒蠹百年之拱要湏一洗聊與更新雲溪居士心住太  
空身無定着今日展旗山下重葺先人之故廬向來垂  
釣臺邊又有子陵之素約天教留此則在此人謂宜遷  
則又遷不妨且同里社之鷄豚也宴時訊雲谿之水石  
金馬玉堂竹籬茅舍顧其所寓如何好天良夜明月清  
風均在適意而已下不逮碧瓦浮烟之潤屋上不如綺

窓籠霧之貴家柳種當門僅比淵明之宅草編成屋或  
同諸葛之廬然而堂上諼叢庭前棣萼高有儲書之閣  
旁連燕客之區花藥分畦堂庭有序是亦足矣奚其萃  
失心匠既成梓人乃命時也農丁告隙霜女獻晴穀且  
于洵脩梁可舉聽我六備作而一心

兒郎偉拋梁東暘谷新栽百萬松他日危簷交聳處  
霜皮鐵甲盡蒼龍

兒郎偉拋梁西石鼓崔嵬列岫低下有老龍藏玉骨  
千年凝竚度雲溪

兒郎偉拋梁南金魚席帽紫霄間堂名日對思親處  
一段晴雲自往還

兒郎偉拋梁北百萬琅玕森翠直墻垣不隔護龍孫  
長看傲雪凌霜色

兒郎偉拋梁上閭闔晴開天蕩蕩有手能脩五鳳樓  
應結雲梯高萬丈

兒郎偉拋梁下坦然心地平如畫不須築屋貯黃金  
但要詩書長滿架

伏願上梁之後昆蟲無作燕雀賀成鶴髮慈親長見孫  
枝之茂霜髯季父早膺子貴之榮不論公府茅簷共此  
溪風山月更願無邊廣廈要令盡得安居

玉樞上梁

地據雄奇天開圖畫秀水匯麒麟之谷正宗派龍耳之

峯百里南來一川橫截碧潭浸石下遊巢葉之龜寶劍  
騰空中有藏龍之洞左岫屯雲而行雨右溪播笏以橫  
金丙丁乃太微之垣日朝金殿乾亥實貪狼之水澤布  
天關良巽四維若城若障坤申二位如筆如旗五六石  
獅在虎伏龍眠之左十餘魚袋列鼈遊鷗陳之前十里  
巖扃千春秀氣山君川后護此幾年女媧天皇至于今  
日雲溪居士神交泉石夢遶烟霞得玉屋山置石之書  
不專糟粕有劉累氏豢龍之術未露鱗牙乃因暇時一  
至此地千古不傳於鈴訣一朝拔起於眠龍乃於戊辰  
歲之秋營我先大夫之兆歲時易畫香燈尚寒載涓剛  
辰肇建梵宇選勝青龍之首恭延白象之尊魚鼓一鳴

山川改色先君尉懌後喬光昌武列文班孝家忠國不  
負前人之志勿忘今日之言百尺脩梁一時盛事

兒郎偉拋梁東甲卯侵雲映日紅下有脩魚千萬數  
他年一一盡成龍

兒郎偉拋梁西席帽旌旗列水犀更有雙峯如並筆  
分明金榜列名齊

兒郎偉拋梁南天開壽宿丙寅間酉鷄初唱催朝騎  
曉奏離明澤暮覃

兒郎偉拋梁北馬上貴人如拱挹天然乾亥一川長  
盡向丙丁朝玉闕

兒郎偉拋梁上此事端由天所相要須修德答天心

更教氣脉騰騰旺

兒郎偉拋梁下俯瞰平疇雲穉稔湏憐火耨水耕人  
佛法上乘先施捨

伏願上梁之後僧徒清淨佛法光輝雨順風調家給人  
足要得萬民之安業永令四海之無虞我當竹杖芒鞋  
共此松風菊露庶與天下佛子於今永結良因湏教黃  
面祖師爲我全開正眼

萬卷堂上梁文

伏以四十年遊宦顧頂自安石屋之居三萬軸崢嶸猶  
未有插牙籤之地况可飽衆腹於今年之歉而又拜天  
賜於一日之閑積雨逾旬新晴一旦工其舉矣僉曰時

哉聊述散懷姑畱野詠

兒郎偉拋梁東挺挺南來太華峯正類當中提一筆  
垂紳正笏自雍容

兒郎偉拋梁西誰遣三山拱護齊正枕中屏旁兩翼  
天儲秀氣瑞雲溪

兒郎偉拋梁南南有三峯碧漢叅不用撥沙尋妙訣  
分明象合鼎魁三

兒郎偉拋梁北列嶂巍峩如立壁中有天門一最高  
全似天街馳玉勒

伏願上梁之後蟬不入簡芸常生香上觀羲昊之皇風  
下掃漢唐之陋迹要令有補於當世庶幾不負於儲書



勸農文

壬申富陽勸農

仲春勸農非文具也令到官五閱月此邦農事大畧可見地狹而人稠土瘠而收薄通縣計之僅支半歲半歲所食悉仰客販今日受詞訴每見其指墮農之人則曰冬田不耕一枝之桑亦必爭護則此邦之農不待勸矣然令尚有所見請以二說示爾農焉其一曰勸農其二曰無妨農令嘗至郊外雖曰田無不耕而糞田不至每見衢婺之人收蓄糞壤家家山積市井之間掃拾無遺故土膏肥羨稻根耐旱米粒精壯此邦之人重於糞桑輕於壅田况是土色帶沙糞又不至則米不精綻根不

耐旱此糞田尚當致力也此邦平地固盛植桑然江東江西之人凡低山平原亦皆種植嘗見太平州老農云彼間之種桑者每人一日只栽十株務要鋤掘深闊則桑根易行三年之後即可採摘蓋桑根柔弱不能入堅鋤掘不闊則拳曲不舒雖種之十年亦可搖拔此種桑之法也低山平壠更當添種則蠶絲之利博矣此令所以勸農者一也周禮大司徒以保息六養萬民既曰恤貧又曰安富大抵富人資貧人以爲財貧人恃富人以爲命貧富有相資之理不可偏廢且如近日因舊會通行已沒之質已賣斷之田紛紛贖以千萬計令未見虛實姑爲施行所當退贖者富人固不可辭所不當取者

貧人亦宜自反有錢而贖者固舊物之思復其間無錢轉假於人者徃徃皆是或取之於東家復賣之於西舍所得不多奚苦結怨縱使贖得未必能守鄰里親戚顏面奚施若是借錢不如就業或加典或斷賣得田之人亦勿靳吝比之平時多捐薄少與之且免爭辨復免贖去今來寄庫之錢既已在官爭辨未定舊會限迫約束分明未得爲業無致過時徒費爭執大抵貧富貴賤死生壽夭莫不有命命所賦受毫髮難逃貧人當知分定節食省衣盡力耕桑辛勤商販無萌負債之心常思富人濟我急用勿萌偷竊他物之念常思官法壞我肌體富人則又自思曰天之生財爲衆人用今吾乃獨多得焉其可不知聚散之理乎消息盈虛天地陰陽所不能免富貴其可恃哉無過取其利息無侵奪其疆界無包占其畝步無陵轢其愚弱契券必分明無攔典無攔賣無浮租雖是鄉俗必竟戾法洪範九疇其一曰五福五福之中富居其次好德又居其次富而不好德則不能保其富矣所謂德者非以物與人也亦非姑息愛人也德者皇極也皇者大也極者中也大則器度不狹中則好惡不偏不狹不偏則存心近厚皆是有德天必報應世固有多行不義剝人利己而亦致富貴者此皆氣數偶差而非天道之常故不能久或一世或不終其身甚者不能數年有因竒禍而赤族者傾家者令嘗多見之

蓋愈富者所爲不義愈多故得禍愈酷又嘗見積德之家其後必生才子產俊人取儒科登顯仕有爲宰相者此無他皆天以其所施於人者而報之也蓋人雖貧窮皆天赤子人而戕賊困苦天之赤子豈不爲天之所惡哉富者能處其富貧者能安其貧則禮義興風俗厚更能輸租以時無事追呼差役旣平不須爭糾篤親族之義無恃長而凌幼叙鄉井之好無因財而害誼小辱必忍小怨勿念無辜殺耕牛無輕生詞訟無鬪毆犯法無唆使人爭訟古人云教唆之報殃及子孫不惟富者可以教子而貧者亦可以讀書如此則爭訟日息田里之人不至官府則可以無妨農矣旣能勤農又無妨農則家安得不給人安得不足哉令生長田野每事不爲虛僞凡所以告爾農者無非樸實可行之說爾農其歸告爾子弟爾鄰里其相與其行之令不勝懇懇焉

橋疏

汪復求東甲橋疏

地屬休寧溪名東甲合百源而同派歷萬折以朝宗遠驅川蜀之車近走湖湘之騎旁連交廣密接江西凡赴上京悉由此渡爭柰春霖夏潦拍岸浮堤坐賣行商姑淹留於旅舍羽書駛足湏臾遽以呼舡然而山東水湍石高浪駭畧計比年之事覆舟者三坐令非命之人爲魚且百是故某等謹發願心輒傾中產之儲首倡千緡

之施雇工閔嶺取石萬安始役三年裒金半萬然而插  
空之石凡七礫甫就三洪覆橋之屋逾萬椽未營片瓦  
初謂可干於闔境未嘗請疏於他州今既力疲勢難中  
輟稽其終事必也萬緡不免亟走中都僭求一語然而  
言輕瓦礫豈能易寶藏之珍或者心發菩提自欲填精  
衛之海他日幾人行坦坦更教千載說洋洋

贈范甥可起

予之仲姊歸于高平有子曰震予字可起口不絕吟六  
藝之文手不停披百家之編汝子暨孫必壽其傳

程端明公洛水集卷之二十一終

程端明公洛水集卷之二十二

說

史說穎濱古史論  
三聖授受

孟子言堯舜禹之終皆薦人於天堯崩舜避堯子於南  
河之南舜崩禹避舜子於陽城天下皆往歸之然後之  
中國踐天子位禹崩益避禹子於箕山之陰朝覲訟獄  
者不之益而之啓故益不得爲天子以書觀之恐非孟  
子之言也蓋舜禹之攝格于祖考郊祀天地朝見諸侯  
巡守方岳行天子之事久矣及其終而又避之何哉至  
益不度天命而輒受於禹已而天下不歸之然後不敢

爲此匹夫之所不爲也而謂益爲之哉古史又云堯舜傳之賢而禹傳之子後世以是而貶禹此以好異議聖人耳昔者湯有伊尹武王有周公而周公又武王之弟也湯不以予其臣武王不以予其弟誠以子之才不至於亂天下則無事乎授之他人而以爲異也故夫堯舜之傳賢是不得已而已禹之不以天下授益非益不足授也亦非禹私於子也蓋啓足以爲天下故也使堯之丹朱舜之商均僅可以守天下則堯肯傳之舜舜肯傳之禹哉是說也蓋亦以常情而窺堯舜禹而不知三聖人之用心均之爲公而已矣

### 孟子說

吾夫子元氣也顏子景星慶雲也孟子巖巖泰山也蓋綏之斯來動之斯和其生也榮其死也哀道冒天下而人不見春生秋殺而物不知故曰聖人之道大至若孟子治家則家齊治國則國治治天下則運之掌其至植桑必於墻鷄彘必以毋纖毫靡密無所不察豈非有用之才哉學者當學孟子之人然後可以達於夫子之天

### 二亭說

一水護田將綠遶兩山排闥送青來此王金陵語也而季同取以命亭夫山水之青綠蓋山水自然之容色也山水有自然之容色事物有自然之理金陵樂山水自然之容色而不樂循事物之理使一代法制變更畧盡

而天下紛然不寧以基戎狄侵陵之變嘻安得謂之樂山之仁樂水之智哉季同坐此亭止此心玩此青綠思天下之大事事物悉有自然之理則萬象容色四時呈露黃河奔放吾益益也泰華突兀吾戶庭也金陵之語不能用而爲我有矣季同性恬不與物競其進此道也無疑勉之勉之

汪秀才求墨說

柯山汪君以儒名家者乃一日袖太玄君見碩洗研試之果非凡材也且欲求予之松房雲溪以爲墨表溪房安能表哉玄君當自表耳胡不觀颯颯萬桐陰一窖千斛塵肯將石壁博沙金天清露下注黃庭

先君六孫名義說

海于百川盍思所以受之納汙藏垢大吾德也含光發恠寓吾神也出入蛟龍噓喻雲雨章吾化也故字海曰宗源木有本不顛水有源不涸培本深源非養不深非正不養故字渭曰養源午夜仰觀太空無雲河漢皎然人心本明無爲物昏惟清乃明惟明法天故字漢曰澄源洙泗講學曰孝曰忠曰誠其源正且清一念舍是舛其大原故字洙曰正源河水靈長汴實分流蓄大益深慶源滋長故字汴曰慶源渥洼水涯神馬所生疑若奔風與虹蜺上下顧乃安玉閑行軌道雍容漢天子屬車無惟異產而惟淑德則培豐緒衍安所限量故字渥曰

長源物有斯名也必具斯義也矧人乎佩之與俱無曠  
無辱

諸孫名義說

古者父命其子祖名其孫名止一字字止二字二字者  
助語耳未嘗用兩實字懼其義之不一而佩之不專也  
回字子淵賜字子貢春秋之時尚守此法至漢則漸變  
然尚少也魏晉之後則此義不白矣予名字諸子一時  
失記今不欲易比名諸孫則用古義焉其恕字以行父  
語曰一言而可以終身行之者其恕乎記禮者曰強恕  
而行求仁莫近焉曰其孚字以純父信不中奚其信純  
乎天德發乎性端則信矣曰其清字以立父果清矣儒

夫間之卓然必忠信行必有廉潔清也詐清非矣曰其  
虛字以容父容盛德也天惟容也故靡一物之不覆地  
惟容也故靡一物之不載容則大大則久故曰可久則  
賢人之德可大則賢人之業虛之時義大矣哉曰其深  
字以長父源深流必長學問踐履皆所以浚其源也浚  
則深矣建老曰其元字以仁父元天德也仁天道也天  
以一元之氣而運其仁人則體元之仁以成其德故曰  
仁者愛人又曰仁者靜愛以仁人靜以自壽與天爲流  
通烏有既邪予在維揚活數萬民兵在閩中欲活數萬  
百姓及其家居則給櫝榘施絮繒立義廩微矣而未大  
也然大也必權以行之孟氏子之言曰如欲平治天下

也當今之世捨我其誰哉吾夫子則曰如有用我者吾其爲東周乎矧孟子之言天淵矣

范氏四甥名義說

仲姊歸范氏有四甥長性緩懼其不立故名以震可起字之起者勇有行也二性逸懼其不誠故名以巽可敬字之敬者順於理也三四皆競爽然皆慮其博而雜散而流故名三以良字之可止止者正也名四以允字之可說說者養也聖人作易一卦具一理一理足萬用衍而能伸用不離本斯其爲名而已

銘

鎮淮飲虹二橋銘

往聞建業與長安洛邑爲古帝王更迭建都之地其地有鍾阜石城大江天闕之勝欲一游焉紹熙辛亥歲自富池汎江凡二十日艤石頭乃陟龍蟠之巔登虎踞之城尚羊四望徙倚終日時九月十月之交也雲空天高千里一瞬見有水焉其一自西南流其一自西北流合于方山以注于江問之則秦淮水也跨水要津有二橋焉循水至橋穹碑屹立迫而眎之則澄江丘公辭也其後十四年爲嘉泰甲子來掌校官事而公亦適縮玉麟之印於此公宿有海內聲名未至也人懾心側足以俟既至也春和風薰因其畏威示以懷柔人益安事益暇暇日顧吾府了無一事因念曰秦淮之上所謂鎮淮飲



虹二橋者得亡恙乎吾昔爲從事時所作也吾所爲記  
實鉞之石度今圯矣吾志也可不嗣乎乃以全撫授觀  
察推官劉叔向曰取材于某石于某甃于某視舊更新  
無所虧增費巨役艱民不與聞五既月工乃成是歲九  
月與次年正月也且洪都滕王閣偉觀也唐中書舍人  
王仲舒從事其州也建焉後三十年觀察其州也又脩  
焉唐人欣艷作爲詞章百世流芳夫閣游觀也矧橋惠  
利斯人乎公獨樂澄江且十年金陵者全吳之藩籬而  
淮甸之腹心朝方起公以爲重也有居六蓼者書來云  
淮人頻年凜無固志日東首謀渡江屬聞丘公爲江上  
帥始肆意耕桑卧亦安枕嗚呼是豈私相爲好者邪一

得人焉係賴若是司選任之柄者其可苟然邪然則公  
以一身之微居長江之上能爲淮人萬里長城二橋顧  
足言邪然是特江淮耳使公而位廟堂則四海所恃以  
爲莫枕者又將如何邪念頗有志斯世耻爲空言者然  
職在庠序他弗與知至於託筆墨紀金石以觀悠久則  
固其分也其何敢與遜乃序而銘焉銘曰

詹彼淮水兩源輸一發萃山一東廬匯于方埭乃江趨  
流貫臺城勢紆餘隆然兩圯據津隅朱雀萬歲今蘧蔭  
智者創物守者愚一作一述後先俱我堂我脩葺所無  
平可轉轂廣方車吞淮跨蜀坦坦涂三邊徵奏萬里書  
夜馳晝走康莊衢公抱闕材聳萬夫區區橋梁直錙銖

推此宏謨磐八區南可關粵北庭胡析木天江海如渠  
胷中長橋隨卷舒唯所巨細用何如青蛇綠字銘翠玕  
詔爾終古繼來譽

延益齋銘

景温分教金陵作新公宇矣又創一軒扁曰延益以予  
嘗居是官也屬銘焉予爲之言曰古之聖賢以道任諸  
已淑諸人未嘗自以爲足也其任道也愈重其求益於  
人也愈切夫子以天縱之聖集道之成眎當時登門之  
士何啻泰山之於丘垤河漢之於行潦哉而夫子之於  
二三子也方且以四子爲友而若有所資也以六子爲  
侍而若有所缺也然則學問之道寧有窮已哉金陵爲

東南一都會四方之學者咸萃焉丞相益國周公好賢  
樂善海內所宗鳴道是邦流風未墜景温躡其芳躅仰  
止高山能以虚心務於求益然則並驅前駕夫孰圉諸  
銘曰

湯湯秦淮涓涓自岷其行萬里浮日浸雲細流交歸莫  
測其津道源於身寔資諸人能遜厥志其積乃盈小智  
自私大惑孰箴巍巍天縱所集大成四友六侍取之其  
門惕若自厲吾道愈尊虚心延益庶幾此意顏何人哉  
希之則是

棣華堂銘

鶉首之月氣方熯有彼儒生云戾止袖中天筆祥雲起

繼以連編如詩市汎觀夫孰無兄弟乃荆不榮棣不韡  
偉哉周氏顧如彼感寤宸衷來天瑞竹木無情皆並峙  
夫豈人力至於此我因拜手窺明旨此扁不獨周氏侈  
要令風化覃遠邇庶幾比屋皆周氏瞻我曾高標義里  
我不敢墜聚千指松旣雙蓮屢呈水僉謂至和鍾厥美  
我聞人心皆天理上天下澤卦爲履兄弟天同曾玄異  
同不可異異反是大宗有法宮有制別嫌爲禮戚踈義  
六經所無意有以若夫睦族尊本始千萬斯年不容已  
曾何九世足云耳

程格之願堂銘

惟復見幾惟靜造理慶雲景星意端所起擾擾萬象孰

知其真日永堂春也樂恂恂是爲願堂之主人

滕縣尉切齋銘

洙泗講學惟一惟精未始汎然一於競名切問近思豈  
其鈎遠如切如嗟一皆可踐近世不然脫影遺形豈其  
不的託以自神軻得其傳仁義皆實無垢發之言言可  
則凜然而敬熏然而親不激不誣如準如繩今之學徒  
師生皆空背瞬乖離孰守其中吾將疇歸昌黎軻雄

月硯銘

零陵山珍湘潭水靈萬丈青蜺橫截天津匣而固之豫  
我玄經丙申七月十二日銘硯之陰

贊

有寫陋質者輒自贊之

彼若人兮嘗見之雲溪又嘗見之紅塵今又復見之於長松之下是殆與世多違而與天爲徒者乎吾將叩長松而問之

松之露可以濯松之風可以披胡爲乎舍之而亟出懷之而未歸雖然汝先歸兮其爲我謝暘谷之靈茯苓之司謹以三年爲期期之而違則請峻北山之移

爾紆紫服乃野其衣爾誇從臣乃逸其人歎世盜名有若爾之所爲者乎噫嘻我知之矣龜蒙之山有猿焉裹以裳衣南海之濱有禽焉樂以笙竽方樂子謂何心乃野乃逸始還其真嗚呼百世之下必有從子聽雪

之塢踏月之林者

王直閣寫真贊

精深而不膚直毅而不諛森乎逢掖之秀汪乎山澤之臞了不見其爲侯門之腴嗚呼斯其爲賢相之元子也夫

郊祀天光贊

首缺二行

若橫虹蜺若聚金鉦峙丹殿之峩峩照碧瓦之鱗鱗維見可睹萬目在廷攷之前聞未傳與經其炎精之盛與其明德之象與其天光之下燭與其陽彩之昭回與其滅旄頭之應其獲玉章之證如漢元鼎之事與既月謁謝霜景晏溫都人縱觀四方和會天顏怡愉和氣克塞

蓋稚一辭於斯爲盛繼其自今錫祉大來天右序之賢  
和物和朝野賡歌天右序之殘胡其殲三邊沉柝天右  
序之雨暘時若多稔多黍天右序之皇壽以昌皇祚以  
長皇德以彰微臣拜手唯君臣一德天心乃休唯一德  
匪懈天休不已於萬斯年景命有僕

賦

壬申歲南郊大禮慶成賦

皇帝御寓十有九載與今爲再見于上帝惟王者父天  
母地尊祖配天顧已疏於三歲矧克脩於十年我 藝  
祖之膺圖秉籙也道冒六合功該八埏儒臣夙咨合饗  
載嚴破前王之陋揭來世之先前期裸鬯至日潔蠲於

稷 太宗重華比隆歲元叶吉 二祖並崇 列聖揚

休是則是共感生配祀火正奉祠興國顯太一之祐咸

平昭五帝之宜熠燿皇文森羅帝儀炎祚中興熙事孔

明備 上聖之繼照顯睿德之升聞中更孽臣胡然弄

兵撓搶搖空戈鋌滿地宮而不郊禮廢以墜倬彼元臣

運膺泰亨 天子善任英明不疑和氣克塞扑蹈布野

年穀豐衍災沴消伏日月燭乎幽衢雷雨灑乎寃齒爾

元老兮以蒲爲輪爾雋髦兮復招以旌拔偏裨兮人自

期於衛霍之列秉圭符兮家不遜於龔黃之名日月功

兮課中才之士拘牽脫兮待非常之英鬱然龍翔油然

霧蒸用能包藏之姦天發其橐干紀之夫神趣其縛豈

曰無幣兮今泉流豈曰無粟兮今紅稠稱鈞衡兮物不  
頗解琴瑟兮聲惟和 天子曰嘻爾相之力元臣拜手  
我后之德天子不居薦之上帝乃稽玉曆乃練上日歲  
紀之申日至之辰先成乎民乃及乎神奉牲以進博大  
以碩奉案以登有芬其苾祝無媿辭天其饗必時也絳  
闕天低宮壺漏遲六龍雷動千官影隨原廟先謁圓丘  
載祗奠奉雲陽之璧瑞陳宗伯之珪露凝冰簋雲飛寶  
爨虞豆夏歲壘酒象醞肅肅乎觥壇之靜洋洋乎英莖  
之遺龍章兮袞輝玉采兮旒垂天容兮雍愉天步兮委  
蛇臣工巍我環佩參差玉鱗金猊燔燎煙霏神光若交  
對越靡遠永言配命流慶丕基禮成樂諧人神以熙宗

卿奏畢殿監授衣已乃輅車樊纓龍旗日并清蹕警嶽  
周盧撤星登龍翳芝蛟蟠螭騰鸞駢豹尾黃鉞金鉦月  
卿按節九軌塵清乃御端門乃宣吳澤陰山瀚海杳無  
垠域頌聲滂洋流祉融液此人之和也六花先紛前星  
澄彩寒氣霽嚴晴光散靄數點灑空適當肆沛此天之  
和也天人並和曆數無疆 天子萬壽元臣作朋靈監  
觀下方外慰寧荅天閔休宣烈斯人益疆不怠吾相吾  
君丕休哉唐虞鳴和明良載歌惟唐有臣亦賦南郊矧  
伊我朝文學成林鋪烈揚芬寧遜昔人望雲章之玉冊  
想翠鸞之芳塵是用作歌憲世千億宣之樂章刻之金  
石

仙露溢金盤賦壽 皇子

日躔角宿昏牛旦觜適與月妃合于壽星此仲秋之候也商精之君曰少皞金官之臣爲蓐收此素帝之所以次於炎皇者也銀榜輝輝銅樓隱隱前星帝子之宮大嶽天孫之宅畫堂甲觀拂丹桂以飄香長坂猗蘭散清香而結佩是以若木分暉天津澄浪太師吹銅而御戶左太宰持斗而當戶右光浮仙露於金盤日映彤雲於寶帳坤合大和天噓一笑得非今日之令辰而皇家之大慶歟至若躬蘇融之忠孝飫王褒之禮詩寬仁秉德未訛前茅聰哲照人有光徃謀千官熙愉四海依詹若夫落雨銀鈎東阿擅筆搖山玉彩龍翔飛章又皆其神末者耳丕休哉眎膳五朝問安三至餐道沐德崇師禮傳侍含元之萬年閱金蟬之千歲猥以寒姿寘之末綴父天母地幸逢震一索之祥日光月輪請獻樂四章之義

金華仙伯賦壽喬平章

八月九月之交沆宕氣清天宇澄穆於是紫陽宣平駕輕風衝薄霧下子陵之瀨入桐君之廬膝行稽首順下風而請於金華仙伯曰恭惟仙伯真坡仙所謂絳闕雲臺總有名應湏極貴又長生者也仙伯曰何哉宣平曰十年以來有大勲勞於王室四方以寧六氣以平建平章之隆名冠輔弼之儀刑得非超然獨出於雲臺之上

者乎駸駸期頤帝又錫齡還童神爽躡雲步輕肩可拍  
於洪崖袂可接於廣成又非隱然翱翔於絳闕之間者  
乎仙伯輾然而笑曰予亦有聞乎宣平於是仰而栗俯  
而慚乃再拜又前曰區區蒙昧居歛之陽餐霞飲泉兀  
兀窮荒至德要道莫睹端芒恭聞仙伯起石爲羊祈少  
賜於刀圭或可脫乎塵滓之場

秋水賦壽李尚書

森兩間之物萬惟五物之莫京上騰乾端五緯粲呈俯  
列坤維五方莫名金石播諸五聲順成黼黻昭其五色  
有瑩贊元功參至化利用群萌於是則爲五行考混沌  
之未鑿惟二氣之堅凝有氣則有水故曰天一所生則

知水者是爲五行之啓征也震下坤上其卦爲復日離  
南斗泉發幽谷體生於冬用見春夏正養於秋至神不  
化詹彼銀潢澹乎午夜相彼兌金接乎夏假則知秋者  
又爲水之靈舍也繫人之生五行肖形英英我公得水  
之精由西江入彭蠡徑盆浦背震澤又折而東茫洋瀆  
泔與沱潛河漢爭先後校疾徐已乃搏扶桑浴方壺渾  
天形以中涵噓雲氣而直上夕月同光太陰合象與海  
爲一莫知其狀此蓋公之德業無涯而勛名鼎盛者也  
鍾河漢之清以爲氣貯滄溟之浸以爲量斲不息之體  
以爲德賦無方之形以爲智蹙回瀾之勢以爲文灑不  
澤之潤以爲仁則得一而正至精而神安得不與此水



也後天而不老先天而固存哉雖然人固非魚魚亦忘  
水縮之一勺不見其膠杯散之八紘不見其滿涖河伯  
不憚於無餘海若無夸於多美獨不見潮乎澎濤沸渭  
蟠吳捲越汝平液息萬里一色變化翕忽誰窺以臆四  
海既澤斂而東湖初九潛陽乃坎之精此則公頃年對  
使者之辭而穎濱亦謂四大海水同一濕性者也厥有  
人焉分井之泉兌金資養離日爲明不爲任公子而釣  
于東海之濱目不存乎鯁鱠鱠有取於鯢鯨公其賜之  
若木露英庶幾汎渤澥而浮滄溟以問乎河漢之津

四明洞天賦代壽何中丞

八月之秋璿穹浸高幕府晝長文書亦靜聊假寐以憑

几湛午日之在空矍矍乎如醉露英飄飄乎如乘赤螭  
而御剛風歷十洲過三島海王戒嚴雍觀不怒舒徐般  
薄於二千七百里之遠遂至于三神山之上於是排雲  
障叩丹門前方壺後赤城貝闕龍蜚玉除虎蹲燦赤崖  
之木石紛瑞壑之瑤琨飲東方之清氣視太陰之吐吞  
仙官佩環威容甚温安期降謁偓佺導前問公安訊官  
今孰尊起經綸於一念去清都於許年布武蓬山舉裳  
諫垣下瑤池之旌節鎮四明之洞天曾未及對忽有頎  
僊左持朱果右酌金舡鼓瑟鳴球鸞鳳飛旋白羽一揮  
玉虬蜿蜒子其歸乎爲吾一言風雲千歲上帝隕祉入  
綿邈廓之圖外刷幽燕之耻然後封泰山禪梁父舉萬

年之玉卮相太平之君子還如頃年領袖僊官集真人  
於斗柄朝北帝於天關言于于而未畢夢蕭蕭而亦起  
夕陽挂山明星浴水望靈瑣以茫然庶憑辭而致喜

### 釣臺賦

予與客泝富春之流入新定之區舍舟卽山將遊乎嚴  
子陵之釣臺客曰詩詠考槃易嘉肥遯洗耳波長嚼薇  
味在或荷簣而歌或濯纓以喟或彈北窓琴或負南疇  
耒或逃去無名或歸來適意或託以酒狂或隱以詩真  
或膏肓泉石或生死絲綸今昔之士何啻千百輩卒與  
微塵斷梗以俱湮而子陵標榜獨到于今耶且吾與子  
幼而學壯且行之莘野磻溪翻然來思而又烏取乎隱

者之所爲乎予咲不荅客亦不言遂相與攀蘿側足  
乎釣臺之巔拂蘚磴以危坐訪幽蹟以遐觀壁立巖  
之石下接魚龍之淵儉萬折而忽平逼象緯於曾關  
旁則重巒複嶂氣象紆環雲魂霧魄棲舍其間鳥啼  
靜泉落涓涓古藤曲蔓陰森夏寒怪木千章天矯龍  
幽壑嘯風空江浴蟾其下則萬頃寒濤回伏奔翔擾  
會波三軍騰裝川君怒靜素練拖江日薄沙晚風帆  
檣一徑接溪草綠汀長維時秋也快清風之颯至  
天之開碧瞰危崖而笑語起老蛟於淵蟄頓足望  
荒使人飄飄然而氣逸於是解觚酌酒晉酌于先生  
嘆哀平之不吊兮人人鬻漢以求官與天子有慮江

素兮乃老百年於釣竿山林鼎食各有意兮未易論  
人於形骸之間既而與客醉卧于石舟人驚報湖  
發

程端明公洛水集卷之二十三

擬古詩

壽皇子

淮南有星  
與沆壑

神龜負圖

淮南有星應期也他非無時必於秋見焉其星有六一  
曰老人磊魁晶熒歲有常期見於秋分秋分維何天高  
氣清玉蟾吐輝銀漢無聲澄霄一色萬里雲平此時候  
之出丙入丁所出之國政化和平人生其時既壽且寧  
矧復前星以及子星與之並明天啓休期應期挺生  
神龜負圖萬世先也道原有始道統無終要其統以朝  
其原也太初孰元渾淪蒙密彌漫宇宙一氣沕滴孰知

是時無極有極天高地下人生物出疇雖未分易雖未  
畫行乎其間充滿周悉炎黃啓序姬孔抉機陶爲泰和  
數千其期寫爲六經萬言具垂太史變法漢唐續維迄  
于我宋皇皇巍巍百代以下上接農義畏天若臨眎民  
如傷消斥姦佞登崇雋良急將寬兵我武維揚選牧與  
部仁風以翔節用裕下根深本強身修國治綱舉目張  
由經而史自皇而王以暨我朝同此一綱天賦高妙學  
力深詳上而河洛之圖書近而我祖之憲章貫千古於  
旦暮歛一心於混茫大哉斯學夫豈經生學士析解章  
句而已哉

鄭沆瀆葆天和也皇穹發靈炎圖中興南呂調儀

千齡金相玉質虎步龍行親師問道日進月新以是事  
親忠孝一忱以是格天昭徹一心人之忠佞事之幾萌  
至則能斷舉無遁情夫是以清明在躬志氣如神綿綿  
若存爲天地根非道之外他有長生又况秋飲沆瀣宵  
見南極風雲叶和海邦寧謐楓宸椒禁雨宮怡愉忠厚  
所根仁浹閭閻頤壽多男洋洋康衢天賜玉卮人歌紫  
芝磐石蘿圖維熊夢竒孔蔓且碩時萬時億

古詩五言

三月十八鎖試童子侍其行卷蕭然無事成二

十韻謾呈同省

旬雨埋青冥今晨浴新陽老紅墮萬劫稚綠羅千行葉

碎青槐古條淨紫薇香去歲護篋當今年已蒼篋

右史憲前

竹萌余去年護之甚至今皆蒼竹矣翩翩鵲引雛伊優雀繞墻有象咸熙

愉對時多慨慷門外車馬喧省中日月長要之非大快

大快在滄浪滄浪興何窮風帆十丈檣明日酌嚴君

嚴自入浮丘蔚南翔浮丘飛升於洪馬抹青山恍入萬松莊

先廬山中多老人雪巔更眉龐持酒相勞苦兒童紛迎將

小卧聽雪塢以下皆山中景物徐步堆雲鄉玉界梅萬本煙海

杉千章三峽桃源浪九夏冰巘霜危橋跨長虹曲水飛

輕觴兩日足可周百年事難量送客出松關壯捷設門

旁揮手謝世人從今永相忘

### 勉子姪

外物不足恃翻覆百年間唯有萬卷書可以解我顏男  
兒貴立志達人得大觀百川日夜流與海會波瀾丘陵  
安於卑寧復望太山方當少年時髮齒未凋殘聖賢戶  
庭闢人人可躋攀謹勿隨餘子碌碌走丘樊

### 揭富陽孝子門

去年何明正有女方笄年母病偕幼弟奉佛祈病蠲既  
蠲未全已剖肝代蘭荃今年盛立旺二子亦奇偉兄肝  
起母病弟復先割股人生貴男兒愧此簪笄女峩峩儒  
冠弁愧此田家子予謬為令長冥愚化不宣彼直天性  
厚或以上澤覃勞之緡酒廩重為此詩篇揭之旌其門  
觀風盛采旃既以勸邦人庶幾風普天

送夏明叔歸建寧

頃與君別時君願未生髭習習二十年驚見紫髯奇相逢不相識眎刺乃得之尊酒出文卷芙蓉陰未移白露團虛簷素蟾墮寒池胡爲於此時與君又語離自言甘旨急毋失舊館期丈夫屬有志富貴無定姿願君勉自力上以慰親思明年寒鴈來殷勤寄書詞爲報秋風高吳仙得桂枝

送常世卿歸嘉興

悔作唐山來山深交友絕相逢忽相得乍見乃乍別嗟此冰玉人寒梅踈帶雪曾次羅文奎筆底耀離纈朝家渴英雋結網仍高設行且收殊科勉哉嗣先烈一編忠

義傳姦萌嘆先折千載懦夫魂脆骨變奇節識此吳中奇復幸拜前哲何異魯國人一朝獲雙珖晴雲起芝田東風催啼鳩慈庭有近書明朝動歸轍新抽草可茵微露花堪折相思復相思後夜天邊月

讀史有感

俗士貪芻豢喜克黎莧腸幽人樂清曠要湔塵土裳嗟予別松林吳砧九換霜困復不知歸念之汗如漿

仲冬望日登四顧坡

往愬有清言晉人未爲達此身皆假合既散安用鍾大音不在絃琴亦安所設當時逃酒徒往往畏侵及豁共桴海時風濤任興息

哭吳范二姊

嘉定庚辰持節吳中冬孟三日得仲氏書以伯姊計來數語爲哀末

有東山十載相從之句庚寅七月十日聞故書見之六月四日仲姊一疾不起因思庚辰至庚寅恰十年非識乎故泪識之

逝者如斯乎翩翩北飛鴻鴻北來歲南人去亡回蹤庚寅仲姊去庚辰伯姊空千里不一見血淚迸秋風自餘只一弟留守先人宮我已日崦嵫安能久轉蓬束擔其歸與相從十載山之東

輓朱侍郎

卜宅從先壟駕言練日良飛蓋驚玄駟古柳被龍恍按轡且徐驅聽歌薤露章憶昔朱峯僊浩劫思陶唐貂蟬換羽衣翩然來帝旁西車極岷峩南佩窺瀟湘高牙開

桂林瑞節照襄陽多少經綸業春風散八荒歸來不言功低簪鴛鷺行一朝侍甘泉天渥方對汝堂堂山立姿九尺鬢眉蒼胡爲勇不留瑤宮去路長夫人有令德威鳳趣歸凰輪摩同入道未忍遽相忘春天渺無際春花堪斷腸祇今楓林崗雙玉一時藏西南多甘棠日莫人淒涼風月三千篇爛爛光生香佳郎與快婿門戶未渠央三者無一憾嗚呼公不亡

輓致政呂通議

營築未休甬曉夕留松區忽聆載輻車歸自杭與湖冷雨澁不晴山徑淖如塗間關五百灘轉軸上雲衢純孝格玄穹安席若平鋪憶昔祖慈親六月暑方徂奠酒雖

百壺練溪焦釜枯今日遡長風辛咀諒一如維公有賢  
稱靄然溢粉間千金手不售其鍾後人乎天畀此石窳  
指顧卽吾廬且復愆以平萬家守者居甚欲一引紱山  
寒阻前趨黃羅金紫峯送日但躊躇

古詩七言

高宗皇帝寶訓終編錫賚進詩

紅雲一朵金爐煙黃傘亭亭午漏傳龍床猶御金華殿  
方進群儒讀寶編編中並載神堯語三十六年真復古  
祇今安用讀遺書卓然已復光前緒 高皇當日濟艱  
難猶在經綸未備間今日山東河北地百年羶去一朝  
還更有 祖宗傳國璽琢於元祐隆平際玉光射日篆

雲飛今日煌煌登寶几 高皇一笑在天靈神孫今日  
再中興賜與千秋萬歲齡甲兵洗盡年豐登群臣尚或  
呻佔畢微臣但拱坳頭立芳筵萃秩及龍媒亦拜聯翩  
自天錫更憶 先朝徹講餘有臣曰軾感恩腴願對紫  
薇花影下試草招來贊普書今也梯航慕中夏無復更  
待招來者微臣但摩千丈松敬賡吉甫中興雅

秘閣儒榮堂

天狼騰騰照單于怒麕抗嶽于上都松漠城高沙萬里  
其下穹廬育此胡皇仁配天覆中寓西垂北際杳無區  
七十年來軍事絕謀臣猛將皆丘墟兜鍪摧剝土氣蝕  
塞馬不鳴秋草枯祈連山下安穩卧歲將金帛自膏腴



文儒申申武士墮先生奮臂一長吁當時顛末誰能記  
家有中原孤臣書吮血爲墨膚爲紙驚風吹到玉蜚除  
誠通精寤動乙覽天經地緯開廟謨手援神矛截河漢  
中天真人正握符蛇龍螭虎雜萬騎庸蜀荆楚從吳車  
皇旅如雷鉄嶂碎汴水云云汴風嘘尺檄夜傳三秦定  
侵田歸魯在須臾向來孽霧漲北極羲和一旦晴光舒  
頓紘提綱無虧闕澶漫萬里宣皇圖怖威報德永無畔  
施令酬功偏裨俱上下兩間皆叶序天錫皇壽天齊驅  
炎精亦曜暢大鈞天祐皇業卑唐虞金石並奏告清廟  
圓壇紫氣靄堪輿卅門宣赦傳天下百萬頌聲流康衢  
此時此書方策勲先生憂國榮有餘

代上楊誠齋

杜陵已醉老坡仙生後百年恨不及那知開眼大江西  
突兀見公正冠幘凜然清風不可攀千載懦夫毛骨凜  
暇時略吐胸中雲坐使九霄成五色未辨執樂三千指  
不計酒材七百石落然收寶入丹田歸省廬阜千尋碧  
那知城裏住相如但信城東有太白一時餘子皆鷓退  
家有諸郎傳正脉世塵千劫都磨盡獨有詩緣渺云極  
天欲留公在世間管領風月長爲客彩鳳一鳴天地靜  
安得微吟容晚出巨止青山吞澤芥許投頑石博拱壁  
先丘宰木已參天幽碣未刊但惕夕魯山四絕先李文  
誼貫幽明光存歿先生匹素不可辜儻得烟雲生勃鬱

化爲匹錦授丘遲磨鈍爲鋸希萬一要是人貪常熟書  
非關買菜復求益詎敢限字如昔聞小大當唯意所適  
庶幾挂在露寒堂琅然一讀意一釋不須點白鱸松鱸  
解衣卧聽歌赤壁

辛亥冬交石阻風三日

陰崖老虎殺氣驕一噫三日攪沈寥日寒不焰雲飛逃  
乾坤蟻轉東南高疾勢已作奔天濤餘威猶捲少陵茅  
魚鼈怖死蛟龍號舟中性命如鴻毛起來危立大江臯  
白沙黃塵紛驛騷徐呼風伯入華蒿指撫八極建六鼇  
翁張橐籥吾誰曹太平之風不鳴條

登紫微崖

富池大信江千里三日醉卧烟蓬底曉來推蓬登斷岸  
因憶牧之呼屐齒九萃隆隆聞天脊微雲低度差參是  
百喚牧之如不聞剝脫塵痕見文字今年十月天未霜  
木葉留露光嶷嶷興亡風流不可論蒼松怪石還如此  
我今與子陟層巔酌酒賦詩云樂只後來誰復是牧之  
斜陽歸路芙蓉水

於潛佳丞四明人同年友也方此掉鞅百未一見  
而來書羅縷無非歸與語豈醉夢書邪三詩見寄  
亟占數語正之

世人眼見真蓮少真蓮却在玻璃沼浣花溪水入銀河  
何人更識月皎皎謫仙不見見梅粧荷稠拳作芙蓉裳

黃龍乾葉何年墮維摩雨華昨夜芳真花真詩元在眼  
要湏心地先清涼不然瀟湘水清寒磯月沙平水晚露  
低昂勸君休問張子房鑑湖十里藕華香天駟超河夜  
未央胡爲自同太白光何時握手論行藏江東雲暮天  
何方

太上虛皇黃庭經句法十篇壽趙帥今存其七

太史告春纔五日東風昨夜傳消息斗邊一星下南極  
飭以貂蟬扶社稷更昌斯文開民則

去年曾說冬菹綠今年蓼甲春盤簇綵花金勝相輝屬  
五色班衣佩蒼玉先奉庭幃千歲祝

莫辭金醖十分斟迺日星郎寵數深庭前桂子更鮮新

鰲頭早晚貼塗金公亦綠髮我華簪

漢列土宇封同姓唐擢宗英持國柄我宋膺圖臨海鏡  
參天祀梓仙源盛蕭敷艾榮何足訂

向也何幸識仙翁玉粟春明盛德容又常一再見阿戎  
神情穎異機生鋒公家流慶無終窮

明年天使九街馳御茗名薰宣玉詞更教儀鸞餉壽卮  
我有新曲名紫芝會當獻之鳳凰池

喬松落澗節輪囷詩書萬卷終經綸日華隔霧光難晨  
公獨知其墮凡塵何當一爲問大鈞

郊臺信筆

江天欲雪未成雪推出雲頭照霜月此夕更長不可辜

何時百萬入彩廬幾年長涎一車麩輸他獵奴飫生肉  
也須龍伯坐鰲頭却看沙磧卧鰕鯨

玉堂畫值有懷萬松

鷄籠峯下萬松山中有游民天地閑左架虹腰上玄圃  
右騎鰲背度飛關幽壑流泉噴三峽袞袞桃花翻浪雪  
兩山對峙錦屏開嫣紫肥紅仍炫白十里松風百喞琴  
丹書一枕卧殘春何人共結無生社冉冉青蜺下玉麟  
九華突兀匡廬禿幽深全似入盤谷懷山一夜鬢如霜  
畫作烟圖入洛陽玉境那容凡骨洿急草天章訊歸路  
磨松琢石歌太平亦表微臣報國恩

汲井溉田民亦勞止歌以相之

短綆長鉞高下飛老農雨汗紅淋漓夜來雨意已垂垂  
一事不成風又吹决破玉龍太清池滿浸萬頃碧琉璃

贈毒菴

高座不知甚面目當時喚作尸利密要湏勿負此標題  
更向托茶山頂立

伐千秋巨木竟梁梅堂

二木盤根三千秋萬斧過之無敢斥今辰有梓號國工  
朋曹十數來睥睨爲言此木難斤斧上有蟠龍下伏虎  
莫教驚動萬年枝掣電轟雷三日雨直湏作法起南風  
號召百神同力扈昂昂頭角向梅堂五六鎮星來作輔  
坐令國勢鞏蘿圖萬歲千秋奉明主

奉送季清赴山東幕府

黃雲銜雪天模糊有客飄然出上都青絲絡馬銀兜鍪  
紅錦韉弓金僕姑劍光壓匣照路隅帕首百騎前訶呼  
不知客本山澤臞今胡爲者意氣籠自言有將新孫吳  
我欲與之同滅胡嗚呼亡胡豈難且病兵法將自逃逋  
胡不觀昔我藝祖造中區以兵爲國垂洪模河北河東  
義勇徒二十四萬鼓應袍中興益振尺五符世忠淮左  
聚熊羆劉錡淮西貔虎俱上流岳飛彎天弧金陵張浚  
羸搏狐單于臺下雖寬誅采石山前已斷顛邇來殘虜  
尚窺窬門內群寇更睢盱胡乃腴剝及其膚豈止牛羊  
不求芻我欲別幕飛於菟十萬一屯淮之區技閑噐利

整平居幟明鼓震菟彼廬精神所折虜如無而况山東  
群盜乎五符儻缺听其虛十年且盡一賦租斬然圻畫  
勿牽渠他時混一更新圖偉哉玉帳得通儒君復碧油  
吐良謨凌烟豈一貂蟬與

新舊句

憶昔丙辰還親旁恰恰先春社三日社日侍親行交源  
紫巖兒拳森玉立是日天明風氣柔入自交源茗源出  
迤邐又復至前山涉澗還家日將沒慈親意在營一丘  
卷卷欲於近舍求當時議論悉未定那知今作汪潭游  
汪潭去家正五里百里來龍於此止至此七韻不記甚  
年作壬辰秋孟中  
未日足龍止水亦止清潭窈無底寶劒秋空橫秀峯春

筓峙最愛丫角羊良木之印鄉長生亥水來朝丙千古  
長溪流不盡雍容冠佩紫薇垣壽星更出丙丁間神游  
既安後昆福賦此銘章皆寔錄

子時歌

順數方來兮邈而上之洪荒今不必短兮古不必長地  
有時而玄兮天有時而黃知靡草之先秋兮又當知喬  
松之傲霜知滄溟之連山兮又當知大華之有長江朝  
云西暮云東兮豈期悉避乎陽光入濛汜浴虞淵兮又  
孰知其扶桑吾烏乎而折衷兮但當付萬化於茫茫

律詩五言

郊祀慶成詩

有序

臣仰惟 皇帝陛下躬上哲之性遵 列聖之謨穆

卜新陽昉嚴大報天地合饗祖宗並崇晴光映於祥  
光冬夜溫於春夜燭卷如綴蕭烟不搖頌聲流乎天  
衢英風薄乎榆塞臣待罪翰墨幸列侍祠懿鑠鴻休  
得所親睹謹撰慶成詩五首一章述大典也二章玉  
輅如青城也三章升圓丘也四章禮成也五章言天  
眷聖德並隆不已也干冒天威俯伏惶懼

粹古皆頻歲炎劉或異祠有唐方定制我宋遂因儀列  
聖馨明德皇穹荅顯祺恭惟聖天子大典應昌期  
涓潔先原廟純忱歷太宮八神開列闕萬騎擁豐隆軌  
道清風肅洪頤麗日紅康衢听細語八彩更重瞳

牙籤猶未進玉冕已先湏峻級飛平步端圭卻掖扶祥  
光匝霄極和氣滃天區福飲煙升已儼神靄瑞符  
紫峙祇堂陞蒼龍奉駕回邊塵知電掃歲稔十年開冊  
鳳覃天澤東朝奉玉杯樓前呼萬歲碑隱動春雷  
謂聖惟能饗由心克致虔天心今答聖聖意更祈天沖  
性猶勤德搜求愈任賢愚臣輸至傲端在賦甘泉  
丁亥閏五月十日回自真聖道坊車中記事

書富陽普照院二首

境勝由盤古聞名自謫仙一從江國後又到老坡年山

頂煙仍紫樓頭月故圓繼今知幾劫風物更依然  
祇愛招提古那知俗更醇寺雖炎漢代人尚葛天民僧  
定都忘客林深自鑱春我來千載後更有後題人

紅藥當堦翻校官試

禁近烟光潤堦平日影暄黃麻芳草罷紅藥正花翻舊  
色浮春動清陰匝午繁心傾青瑣客香滿紫微垣漏永  
文書靜天低雨露温人言有仙骨早晚拜明恩

夜登釣石

頗憶嚴君瀨還尋釣石緣鄰雞方叫月邊鴈恰書天句  
秀來仙白聲和應樂全展編真一快如放五湖舡

憲聖慈烈皇后輓詩二首

西澣俱來日東朝極盛時彫弓平黑海彩筆照丹墀  
起先裁費冊成不用鑿人間空悵望風月宴瑤池  
聖祖艱難業重孫擁佑恩玉妃閑寶簡仙御送金根  
杳龍先去翩翩鳳又翻塗山望堯穴日月萬春存

光宗皇帝輓詩

厭聽人間樂催成海上丹雲車分白象天仗下紅鸞  
梧野朝烟淡咸陽莫日寒龍舟宵濟處清血漲紅干

光宗皇后輓詩

玉鎖辭椒禁瑤宮問廣寒人間方祝馭天上忽飛鸞  
弱水三山鬲華胥一夢殘聖情疑望處仙御景雲端

寧宗皇帝輓詩

聖德同天運神功並日昇韃真懷慄慄齊魯格烝烝復  
古周圖盛中宗漢業升未饒元結輩磨筆誦中興

輓程給事

戀闕葵心在懷山秀野寒華繁常侍媿草隸折衝難結  
綠紅輝碎懸藜夜色殘平生桑梓地雪涕景雲端

輓汪給事

抱大難傾橐隨時欲見田星災諸葛日齒少紫芝年魯  
國麟枯骨藍田玉折瑄忍聞環珮響帝所侍鈞天

輓范端明

諸老都淪謝惟公尚典刑謀謨闕社稷風采聳朝廷政  
路方虛席台躔遽折星幸哉芳史在寧用問丹青



輓吳郎中

志抗金堅厲材成玉粹温時哉非不遇命也更奚言季  
子風流遠吳公治行存敬亭無恙否愁絕暮雲昏

輓程樞密 二首

厚德推吾黨脩名靄列紳明經魁別幙仗節聘殊鄰南  
嶠思良牧西樞失重臣龍原高冢在千古卧麒麟  
忠壯源尤遠新安盛莫偕千年瑤斗柄一夜玉樓階學  
業光文簡儀刑謝良齋曉鍾傳恨處清泪落天涯

輓宜人趙氏

分胄天皇媛來嬪相國孫孝慈山上梓法度澗濱繫鳳  
去簫沉響鸞空鏡掩痕家庭熏沐事千古說南軒

輓徐提舉

人品真豪爽天姿尚典刑晝簾深院宇春旆擁郊垆雲  
子千艘白塩烟萬竈青甬州高士傳三嘆一彫零

輓蔡祭酒

孝友尊前哲詞章裕後生栢臺真御史槐市大司成騏  
驎風方力餘艣浪忽傾山寒丹旆急識者爲霜纓

輓曹監丞 二首

學渺千江水才雄百尺樓鳧飛思葉縣燕寢憶蘇州有  
感珠還浦無苛虎渡洲浦江天闊處缺月正如鈎  
歲鳳方翔漢寒鷗已宿林平生惟好士無日不揮金駟  
牡頻催駕琵琶遞絕音山名昇白日回首一霜襟

輓錢塘蔡令君

少年思賈誼中壽憶賓王軍政存鍾阜民庸在括蒼馬  
蹄歸鳳闕車軸折羊腸喚起青油夢悲風攬白揚

輓王柳州

才華唐令尹名勝晉參軍善政流郴水遺風襲緝雲寶  
釵當自合神劍不中分心折白巖路猿吟日未曛

輓楊提舉

風慘琳宮曉雲愁鐵甕春鴻冥方避弋鱸集遽成塵金  
虎多遺愛銀菟愧後人尋思漢循吏竹帛逐時新

律詩七言

五十六字庸以告未知野夫者

寧湏山澤論高平但要曾餐石決明三世擊鍾敲石磬  
十年學劍斲銅釘倘知狐祖天邊去肯向蠻奴脚底行  
更許野夫尋上着十洲三島一宮城

慶元丁巳十月奉親如臨安宿西菩寺表弟吳

克仁俱焉

二首

熙寧相望百餘年又有人如古鉄頑日落尚憐今夕路  
月明無恙舊時山朱紅野實堆盤裏粉白詩牌滿壁間  
欲爲慈顏供一咲更番數語任渠刪

安車未向都門移且攬西菩一段竒路入山腰湏種樹  
泉流石齒莫開池重來坡老今誰是出世參寥不記時  
結束匆匆出門去白雲明月舊相知

用朱經畧韻

歸來南橐舊蕭蕭，但有新詩照佩瑤。  
峴首溪山歸點染，湘天風月困吟嘲。  
輕裘詩帥風流在，岳牧詞臣意氣饒。  
見說玉堂須翰手，公當歸侍紫宸朝。

用丘樞密韻

起自澄江應夢求，天還河北百餘州。  
嵩瀍處士歸羅致，淮蔡竒謀入彀收。  
午夜金陵瞻斗極，千年胡昴滅旄頭。  
會須再作中興曆，還許諸生執筆不。

作堂六桂之東，命之曰桂生，取漢人招隱篇桂樹叢生之語也。詩以記之。

幾年列植擅清芳，今日標題始作堂。  
遠向松岡分老蔭，近於菊畹借寒香。  
地雖未離人間世，心已全然物外鄉。  
最好夜來清絕處，飛霜帶月下南塘。

賀費樞密登下忠貞公墓

底用荒村訪野墳，青編相對儼如存。  
當年但識清談樂，今日方知節槩尊。  
千載腐儒空吊古，幾章冷語自消魂。  
便當僂力清河洛，一洗新亭舊泪痕。

流觴西湖用范左史韻

畫航同載若登仙，却笑泥羈馬不前。  
要識冷煙催穀雨，須知澹日養花天。  
千條翠柳隨風舞，一樹夭桃照水妍。  
須信人生行樂耳，虛名那用世間傳。

雪

北風傳信報登平白帝宸遊墮玉英月下草玄疑蜀客  
鼎邊得句失軒明莊巖東閣若為好點綴南枝分外清  
惟恨蔡州城北水一池鵝鴨更無聲

程端明公洛水集卷之二十三

程端明公洛水集卷之二十四

絕句五言

小憇許由亭

曆數河南去乾坤一草亭一亭猶是累千古盡浮萍

喬松

風細吹吟鳳雷驚起蟄龍幾年卧空谷今日享真封  
歲暮

綵帖瑜糜濕屠蘇琥珀濃夕陽猶臘日午夜已春風

三月三日度白際

日望黃尖杪今登白際巔千山皆委地一臂獨擎天

戊子正旦賀壽慈宮 二首

曙色浮丹拱春風煖禁街微瀾迷秀石織草蔭新槐  
鳳駕回天仗鴛班集露門須臾趨魏闕杲日正中暎

粥罷

飯已茶三啜隅中粥一盂陶然詠皇化安用東封書

絕句七言

冰

白日黃流漲渭城三更風緊盡成冰莫言此物渾無用  
曾向滹沱渡漢兵

甘將軍廟

沙寒日薄水雲愁賊魏王吳一夜休自是英雄元不死

至今猶占大江流

晚發富池

甘王樓下一帆風獵獵舟旗照日紅醜酒三江飲龍腹  
摩挲冠冕是誰功

昭明太子宮

千章喬木烟蒼蒼一帙遺文字字香梁鼎西沉何處問  
至今戟手看興亡

陳時栢

陳未亡時栢已蒼風來歷歷說興亡世臣元不如喬木  
閱盡中原幾戰場

夜雨

玄機粗透古人曾每說匡來晚未工珍重芭蕉前夜雨  
為傳消息到墻東

築徑

入門一徑小紆回百本芙蓉手自栽寄語後來須善護  
三年猶及見三開

觀史有感

紛紛賓客趨驃騎何事任安太樸踈却笑君非王太傅  
不容朝士不回車

別金陵官舍雙栢

手自移時尺許長三年拂拂及宮墻願言勿負栽培力  
保此堅貞傲雪霜

復朱教授

其前雪蒙佳句再雪乃得為謝信矣  
相如之思遲也然亦遂為一段公案

詩成催雪豈無功今果裝嚴七寶公休說春花那解舞  
也教耳熱慰新豐

朝來照眼百瓊瑰為有詩筒打雪來不止梁園許分簡  
詩壇高築比雲臺

送李侍郎安撫浙東

通明殿上紫芝仙乞得閑身下九天今日都門臨祖處  
幾人驚嘆着鞭先

夜來天闕望文昌移在藩臣斗極旁千尺濤江元不遠  
公當早晚對明光

直廬閒賦

二首

一陪鸞鳳入仙臺四見薰風舞禁槐自笑平生無夢到  
那知今日以身來

紫宸朝退曉光寒百吏犇曹一吏閑便可雲卿稱散秩  
柰何名籍尚人間

雪霽玉堂曉眺

當年銀界隔鯨江今日分明玉作堂不是瓊林宮樹密  
也應白虎接明光

兩炬並花

雙蓮合葉更開花報道金鑿日未斜已草禁中新鳳詔  
趣君十日覲東華

脩玉牒官閣子坐屏甚古詰吏亦不知曷始數

語紀之

摩詰何年留此筆至今雙壁猶崑崙老松掀甲作風雲  
亂石激流殷霹靂

吳綃一幅苦無多中涵大萃及黃河偶然乘風山下坐  
紫烟翠靄坐中過

早入

紫薇浥露翠條深捷捷靈鳥振好音全似冰巖亭上坐  
四屏煙靄奏春禽

直廬多暇新綠鬱然信筆二絕

朝絕倖恩除日少邊清妖祲檄書希飯餘摩腹閑行立  
一抹墻東新翠薇

壁右方壺浸碧天依然全似太湖邊清風一夜生新興  
好把漁竿上釣船

江山道中瀑布

松風一壑偈人寒老石琤琤響碧湍疑是銀河天不鎖  
馮從雲際下人間

梔花

青琅削葉玉花鈿獨占炎皇第一天未羨冰桃垂夏後  
且看金子粲秋前

朱生論天

不知占得幾躔星閱盡人間聚散萍今日重來橋上望  
依然楊柳兩行青

爲釣臺作

人道秋風長桂時天台散種未爲遲如君笑到白榆窟  
揀取南來第一枝

擁爐

已甘灰冷竹窓前那意移來近繡氈唯有幽人一寒暑  
閉門高卧雪深天

中秋無月

常時斗暗猶閑事無月中秋可若何我欲梯雲千萬丈  
取光還月謝羲娥

春帖

輕烟薄霧鎖平川全似江南二月天昨夜溪頭新雨過



分明洗出太平年

程掌書 二首

夜來踏月過臨川水  
面粼粼挂魄圓  
此際高人方熟寐  
難爲一扣綠筠軒

分明如夢縞玄衣  
傍月凌風自在飛  
夢覺出門都不見

不知已上子陵磯

此行專看釣石

孟夏廿一東作秩然

不見東耕四十年  
茲晨簞笠去翩翩  
從今數過三冀朔  
史筆當年大有篇

五鼓夢中作覺而成之 二首

人生萬幻一釐輕  
須築銅駝萬里城  
莫道斜陽光不遠

斷霞收盡十分明

當時千駟已無聞  
寧說牛羊上塚行  
同是博陵評古者  
肯令千載尚齷齪

閏九十四

午夜青衣海上還  
八年兩度雪封山  
如今一水平如鏡  
好釣桐江五百灘

送松煤十九與葉秀才

雲溪深處萬松林  
煙起晴天自作塵  
根向九華分結處  
與君同是墨仙人

出南郊清甚

春風吹屣到南園  
着酒塗酥花正繁  
更喜滿前無俗物

橫塘踈竹渭南村

輓太府丞知徽州韓公

翊運勛臣第一家却於翰墨掇英萃誰知忠孝千年事  
不逐春風落水花

魯國夫人薤露歌

並海名山萬疊開太慈太白等蓬萊自從齊國鋤雲後  
又見夫人駕鶴來

樂府

水調歌頭

昏發烏江朝至湖陰月正午舟中作

玉女掃天淨雍觀掠江寬問君何事底急夜半挾舟還  
三島眠龍驚覺萬頃明瓊碾破涼月照東南碧氣正吞

吐滿挹漱膺肝 煙蓬上乘雲象噉天關人間已夢我

獨危坐玩漫汗螭殿黃昏未鎖鶴氅翩躚蜚下共吸酒  
壺乾興罷吹笙去風露五更寒

又

壬子五月二十三日流盃玉泉雨忽大作連賦水調二章一書于壁一懷以歸

電闕驅神駿鐵槌起癡蛟木鳴山裂盛夏白晝野魑號  
急上瑤庭深處為問龍君何怒抉破古天河日華開絢  
采雨意屬詩豪 與君來蜚玉佩斬觚瓢纖流沈羽借  
我萬斛沸銀濤醉拍滿缸香雪寫竭一池濃墨逸氣正  
飄颻何事謫仙子歸去續松醪

日轂金鉦赤雪竇水晶寒支機石下翻浪噴薄出層關  
半夜雌龍驚走明日靈蛇張甲蜚上石盤桓多謝山君

護未放醉翁閑 安得醉風泚泚露珊珊翠雲老子邀  
我瑤佩駕紅鸞一勺流觴何有萬石橫缸如注虹氣飲  
溪乾忽夢坐銀井長嘯俯清湍

又登甘露寺多景樓望淮有感

天地本無際南北竟誰分樓前多景中原一恨杳難論  
却似長江萬里忽有孤山兩點點破水晶盆爲借鞭霆  
力驅去附崑崙 望淮陰兵冶處儼然存看來天意止  
欠士稚與劉琨三拊當時頑石喚醒隆中一老細與酌  
芳罇孟夏正須雨一洗北塵昏

又自壽

渤澥東南界西北倚崑崙當時控步但知宇內有乾坤  
午夜風輪微轉駕我浮空沆景一息過天垠俯眎人間  
世渺渺聚漚塵 挽天吳摩海若吐還吞寧用計年八  
十陽九又三陰要自白榆星外直至黑流沙底山與澤  
俱平不論初末度一色界如銀

六州歌頭

送辛稼軒

向來抵掌未必揔談空難徧舉質三事試從公記當年  
賦一丘一壑天鳶濶淵魚靜莫擊磬但酌酒儘從容一  
水西來他日會從公曳杖其中間前回歸去已笑白髮  
成蓬不識如今幾西風 蒙莊多事論虱豕推羊蟻未  
辭終又驟說魚得計孰能通嘆如雲罔罟龍伯啖眇難  
窮此三惑誰使我釋然融豈是匏瓜者把行藏悉付鴻

濛且從頭檢校想見迎公湖上千松

滿江紅

龔撫幹示  
閩中秋

黃鶴樓前江百尺波橫光溢問老子當年高興何人知  
得最愛洞庭天際水分明表裏玻璃色恐今宵未必似  
前番天應惜都莫問鴻鍾勒也休羨壺天謫憶故人  
霜下亂灘橫笛便好騎鯨游汗漫古來蟾影何曾沒更  
明年重約再來時乘槎客

又

登石頭城  
歸已月生

頗恨登臨浪自作騷人愁語石城上何須苦說死袁生  
褚當日卧龍商畧處秦淮王氣真何許與君來蕭瑟北  
風寒黃雲暮枕鍾阜湖玄武生此虎真蹲踞看四山

環合休臨江渚可笑唐人無意度却言此虎凌波去君

且任明月爲人來潮生浦

八聲甘州

別陳  
總帥

玉局仙人輕帆萬里送入三吳恠一舟如葉元無濁物  
依然姑射滿載冰壺昔日文君千言成誦不識如今記  
得無新來也喜都將分付一顆驪珠向來田賦蠲輸  
散多少春風巴與渝笑公家粗了尊鱸而已何妨西子  
白髮江湖印鑄黃金時來須佩畢竟人生萬卷書離情  
處正秦淮歲晚雪意模糊

步虛詞

壽張  
門司

休怪頻年司鑰仙官長守仙宮東風未肯到凡紅先舞

雲韶彩鳳 都是一團和氣故教上苑春濃群仙拍手  
過江東高唱紫芝新頌

沁園春

壽王運使

公有仙姿蒼松野鶴落落昂昂論法主長生仍須極貴  
雲臺絳闕都許尚羊更憶當年而今時候一念功名下  
帝旁天分付使人間草木盡有春香 人知相法竒麗  
又那識陰功事更長笑毗陵荒政江東風采忠文典則  
凜凜生光再歲秦淮觚稜入夢帷幄從來在廟堂公歸  
去好平心獻替人望時康

又

壽李通判

那用招秋休言推暑風自薰芳問誰解當初識公來處

月明碧落旆卷青霓千丈長松起人生意凍萃寒瓜空  
滿畦還堪怪怪諸公衮衮我尚憑泥 須教一舉崔嵬  
笑人世功名各有梯更何須煉鼎玄霜絳雪只煩煮茗  
水餅冰壘紫府多仙招來滿座公自長生角亢齊何曾  
也有玉麟行地老鳳梧棲

又

謝劉小山頌寄所作

君有新詞何妨爲我時遣奚奴看此山大小風流晉宋  
眼中餘子苦自侏儒九曲清溪千枝楊柳還記新條更  
有無春將好欲從君商畧君意何如 佳人玉佩瓊琚  
更胷中澆灌有詩書把古人行處從頭檢點今人說底  
却不須渠更上石頭重登鍾阜畫作金陵攷古圖頻相

凡怕薰風早晚便隔天隅

又庚午三月望日賦椿堂牡丹

消得凋欄也不枉教車馬如狂怪元和一事韓公子者  
歸來斲去玉毀崑岡為解花嘲朝來試看采佩殷霞浥  
露香君休怪笑只緣太艷俗障難降 詩人未易平章  
向百卉彫零獨後裝看洪爐大器從來成晚只須這著  
也做花王况是月坡花園一尺壓盡紛紛瑣細芳還堪  
笑笑龍鍾老鳳方入都堂

又讀史記有感

試課陽坡春後添栽多少杉松正桃塢晝濃雲溪風軟  
從容延叩太史丞公底事越人見垣一壁比過秦關遽

失瞳江神吏靈能脫咎不發衛平蒙 休言唐舉無功  
更休笑丘軻自阨窮笑汨羅醒處元來醉裏真教假孟  
畢竟誰封太史亡言床頭釀熟人在晴嵐杳靄中新堤  
路喜摻枝鱗角天矯蒼龍

錦堂春 留春

寂是元來苦無風雨只恁匆匆歸去看遊絲都不恨恨  
秦淮新漲向人東注 醉裏仙人惜春曾賦却不解晉  
春且任問何人留得住怕小山更有碧蕪春句

壺中天 壽丘樞密

日躔東井正輪囷桂影十分光潔火令方中符國運天  
與非常英傑犖犖平生眼空宇宙綠髮千尋雪笑談一

鎮單于底事心懾 晚歲佛地功深人間富貴五湖烟  
闕誰遣心期事左湏酬滿麒麟勛業又也何妨長生仙  
錄已在黃金闕中原恢拓要公歸任調燮

燭影搖紅 元宵

青旆搖風朱簾漏月黃昏早蓬山萬疊忽蜚來上有千  
燈照和氣祥烟繚繞映瓊樓五雲縹緲青裙綺袂亂吹  
繁絃九衢驩笑 元是琴堂十分管領春光到手移星  
宿下人寰招客來仙島信道邦人見少彷彿似皇都春  
好明年只恐熬山扈從隨斑清曉

謁金門 用趙帳幹韻

烟漠漠醉裏看春都錯過了清明遲一着牡丹重約摸

曉日漸明簷角天與芳辰難卻駐得韶華元有藥桃  
源誰共約

水龍吟 壽李尚書

道家弱水蓬萊鯨波萬里誰知得人間自有南昌居士  
仙風道骨詩似白星兒如晞老風塵挺出向謫仙家裏  
滕王閣畔飄玉佩下卅闕 黃髮四朝元老又誰知重  
生綠髮手提一筆活人多少三千功積已冠文昌人人  
詹望玉樞躔偏對新涼酒頰微紅宛是一星南極

喜遷鶯 別陳新恩

少年意氣腦燕兵胡鞞虜王區脫眼底矇矓腹中空洞  
不著曹劉元白聞道殊科八中也要彩盧連擲收拾盡

到如今但有寸心如鐵 天付真竒特口靜神充雙眼  
明僧碧楚國離騷唐朝詞學未信芳塵歇結取佳人香  
佩截斷兒曹綺舌歸去也且爛斑戲采好春長日

又壽李文昌

評君誰似似長松千丈離竒多節骨瘦稜稜文高犖犖  
今日來仙闕走卒識公容兒酋虜問公官闕更史館一  
編書多少頻添勛業 偉絕今歲別新綠名孫又見枝  
生葉底事七旬雙瞳如水畢竟桂花方發賜第彤墀秋  
早又一瑤樞光潔故人也念相逢誰似鳳池同列

又壽薛尚書

一天風露喜初行彈壓人間殘暑金母此時雲輶先降  
又見樞星光吐人道鴻濛逢日可是東方明處更天上  
走王人絡繹儀鸞瓊醕 聽語更希舉試把皇朝盛事  
都來數當日鰲頭皇扉侍母綠髮方瞳更有飛鳧王季  
徃徃文星再聚渾休問但回班千歲貂蟬成譜

又壽薛樞密

去年玉燕記魯期今歲瑤光入度今日都人從頭屈指  
盡是黑頭公輔爭道一朝語合誰信千齡際遇更積雨  
曉來晴洗出璫璃秋宇 笑語如何許旃卷青霓來自  
人所道骨仙風安排頓着須是人間紫府要識雲臺  
高絕更有鳳池深處從今數看千秋萬歲永承明主

柳梢青 壽薛尚書



官已尚書人猶寒素仙有名言謂是若人法當至貴仍  
主脩年 唐人四字鮮妍堪照映畫堂綵烟更對新涼  
一聲芝曲萬斛金缸

又和齊仙  
留春

嫩綠成堆朝來紅紫都在莓苔方見春來又聞春去暗  
裏誰催 人生易老何哉春去矣秋風又來何似雲溪  
長春日月無去無歸

醉江月 丙子自壽

平生有意把六經膏澤人人霑受白被子明康節輩浪  
說乘除先後遇合一時英雄千古誰是高強手蹉跎歲  
晚臨風浩然搔首 今但入夢青山雲溪深處烟月生  
懷袖宿有十年蕭散願此段功緣湏就因憶坡公仇池  
有約莫悞歸時候今朝對酒歌此與君爲壽

賀新郎 壽李端明

袖手雲溪上看人間紛紛饑烏腐鼠觸蠻交戰便得金  
魚垂玉帶多少雌黃點勘笑此語必非河漢直自彈冠  
班八座更青春數到期頤笑一段玉無纖玷 公難學  
處尤堪羨全似泠泠秋水體清形健袞處從來高一着  
那肯隨人脚轉要湏是常見乾坤清晏天意未教公猛  
去要都俞了却從公便歌壽筆朱簾捲

寶鼎現 壽李端明

綠楊欲舞紅杏微芳春工漸侈試僂指自從嘉定數到

寶慶裏無一歲不書年大有問元功誰燮理於變雍熙  
如此自當千歲 况是端笏蓬萊陛但看雍容玉立山  
峙煉五色補天無跡扶日天衢光四被安清拓填群心  
聲色恬然如談笑耳更八荒民生奠枕此着又當千歲  
又况善述先猷嚴武備不聞邊鄙陰功徧南北千歲  
未多疇祉且說總是三千歲此際方岐嶷聽今日處處  
笙歌何止南樓十二

念奴嬌

憶先廬春山之勝

歸來一笑尚看看趁得人間寒食阿壽牽衣仍問我雙  
鬢新來添白忍見庭前去年芳草依舊青青色西湖雨  
後綠波兩岸平拍 天教斷送流年三之一矣又是成

踈鬲燕子春寒渾未到誰說江南消息玉樹熏香冰桃  
翻浪好箇真消息

山間景物

這回歸去松風深處橫笛

又

初見海棠花

嫣然一笑向燭花光下經年纔見欲語還羞如有恨方  
得東君一盼天意無情更教微雨香泪流卅臉今朝霽  
色笙歌初沸庭院 因是思入東屏當年手植徧桃源  
低岸失脚東來春七度辜負芳叢亡限問訊園丁寧如  
歸去細與從頭看東風獨立白雲遮斷雙眼

傾盃

丁亥自壽

鑿殿秋深玉堂宵永千門人靜問天上西風幾度金盤  
光滿露濃銀井碧雲飛下雙鷺影迤邐笙歌近笑語群

仙隱隱更前問訊墮在紅塵今省 漸曙色曉風清迥

更積靄沉陰都捲盡向窓前引鏡看來尚喜精神炯炯

便折簡浮丘共酌柰天也未教酩酊來歲却笑群仙月

寒空冷予家天都山乃浮丘仙升之地

醉蓬萊壽王司直

笑千葩百卉誰伴東風早春時候唯有江梅在人間長

久雪後霜前衝涉多少尚精神如舊歲歲年年醪酥飲

了便為公壽 更向尊前席上細看人與梅花稜稜爭

瘦桃李漫山都落芳塵後和氣滿身參調玉鉉表天然

孤秀來歲今朝星闌霧閣一卮春酒

又丙申自壽

記蟾宮桂子撒向人間如今時候白下長干亂灘橫笛

想昔游依舊大海一漚千年一息誰稱彭壽 開徧門

前卅棗漸西風入東籬釀成仙酒卓筆雞籠懸天寶蓋

占斷宜徽秀來歲清茗公家事了斑衣藍綬

西江月壬辰自壽

天上初秋桂子今歲七月月中桂子下庭前八月丹花一年一度

見仙槎秋色分明如畫 願把陰功一脉燈燈相續無

涯降祥作善豈其差永作漁樵嘉話

又癸巳自壽

底事中秋無月元來畱待今宵群仙拍手度仙橋驚起

眠龍夭矯 天上靈槎一度人間八月江湖西興渡口

幾魂消

癸丑八月  
侍親西典

又見潮生月上

滿庭芳

雪登前嶺自己酉江右雪行彌月  
四十七年無此樂也今再見之

未歲嘉平初旬日四雪中歸自崇唐山林湖海一氣接  
蒼茫踏盡玉龍千丈更一望龍尾天長湏臾上高峯四  
顧迤邐過前岡 群山如玉削松林百萬盡傳瓊霜渾  
疑是天際一鶴翱翔人道玉皇三六欲一叩風力方剛  
明朝好金烏銜燭八表散祥光

又

戊戌上元喜  
霽昉開桃洞

去臘飛花今春未已迤邐將度元宵俄然甲子青帝下  
新條淨掃一天沉靄紅輪滿大地山河從今好便當聽  
取萬國起歌謠 有人當此際鋤雲深塢剪月中阿已  
占斷春風自種仙桃更扶踈桂影直從巖底上拂雲梢  
仍爲我長摩蒼石無負此清波

又

戊戌  
自壽

人道蒼姬燠多寒少故教千歲綿綿笑來春夏一氣本  
無偏底事今年玉曆秋未朔風露冷然君知否山深地  
僻自是早霜天 如今當此去十分親切面問嬋娟何  
須看仙槎海上重還好在金英玉屑爲我滿汎金缸仍  
傳語橫江秀石永鑠三川

減字木蘭花

不應雙睫看盡人間花與雪曾是當時一朶紅雲擁日  
飛 如今正好萬綠千紅深處坐也使春工喚作天池

五月風

程端明公洛水集卷之二十四終

程端明公洛水集卷之二十五

附錄

制詔狀

敷文閣學士程秘轉正議大夫制

勅奉壽卮於長樂方深追慕之悲通禁籍於甘泉尚共  
榮懷之慶有嘉宿德何愛崇階敷文閣學士通奉大夫  
提舉隆興府玉隆萬壽宮休寧縣開國伯食邑九百戶  
賜紫金魚袋程秘學邃而識融履純而養厚濟時鉉議  
五英六莖之蘇華國高文四璉八簋之古自玉堂之引  
去每宣室之典思胡扼虎關尚閒駒谷復非遽復已萌

於碩果之餘朕不終朕必合於遇雨之後首進班於穹  
閣仍賦廩於珍臺在爾初無慕爵之心惟朕蓋有懋官  
之典肆加蕃錫庸侈殊私施戟方新寧鬱起家之望佩  
囊惟舊毋忘存闕之忠可特授正議大夫餘如故

端平元年五月 日

敷文閣學士程秘轉正奉大夫制

勅等六曹而上課嚴三歲之遷超四品而升秩重八年  
之轉雖循彛典實著恩章敷文閣學士正議大夫提舉  
隆興府玉隆萬壽宮休寧縣開國伯食邑九百戶程秘  
粹學淵深英規山立謀猷獻納備殫日月之忠典冊鋪  
陳叶應風雲之會繇祠庭之引興每魏闕之存心積閱  
既深陟明可後飛鴻自適初何計於穹階鳴鶴相求肯  
尚遺於宿德可特授正奉大夫依前克敷文閣學士提  
舉隆興府玉隆萬壽宮封如故奉

勅如右牒到奉行

端平元年七月十四日

賜程秘辭免端明殿學士恩命不允詔

勅程秘省三省進呈卿狀辭免除端明殿學士恩命事  
具悉端明設職自後唐暨我國朝必以翰苑兼之不以  
他屬然熙寧中王素致爲臣而去非翰苑也而由是始  
帶職焉貴之也卿昔以華藻之文徼直亦有年久賦退  
居而不得謝怡然有終老之意朕甚高之來章荐至好

遜是祈用倣故實以卿嘗職鑿坡則還以秘殿爲得當  
矧熙寧有謝事比焉曷爲予違尚登巽櫝是嘗居其位  
者獨不知其事乎合而言之何爲不受所辭宜不允

淳祐二年四月 日

宋故端明殿學士宣奉大夫致仕新安郡開國  
侯食邑一千五百戶贈特進少師程公行狀

公諱秘字懷古世籍徽之休寧胄出重黎休父與嬰卓  
見經傳至晉元譚持節渡江守新安有功於民詔賜田  
宅於歛遂家焉有靈洗忠義自奮脩食武帝繼是蟬聯  
代有顯人爲新安著姓曾祖諱自誠里中稱長者妣吳  
氏祖諱會亨強記博識書法逼長蘇公妣姚氏考諱文

夷故承務郎致仕累贈宣奉大夫妣黃氏繼黃氏俱贈  
淑人宣奉公少以文學稱蜚聲庠序公兒齒頴悟稍長  
卓犖有大志十歲賦冰有莫言此物渾無用曾向潯沱  
渡漢兵之句識者謂必有立於世讀書日數千言弱冠  
與諸老游議論超卓每曰張公拭呂公祖謙人正學醇  
不壽不大天也紹熙四年登進士第時丞相趙公汝愚  
典舉春官一見公文曰天下奇才也擢魁多士有以道  
學疑者真本經第二公論稱抑授迪功郎主臨安府昌  
化簿邑介萬山士風弗振公至篤意經理不啻父兄之  
於子弟由是捧鄉書預廷對者相望邑之酤額重權禁  
嚴有種秫者官必履畝而籍民以爲病公言於御史奏

蠲其額百里德之凡訟久不決者投牒臺郡乞以委公  
能聲籍甚公以明經擢第素工音律復試兼科秩垂滿  
丁外艱居喪哀毀備至服除再欲試詞科丞相謝公深  
甫曰君廊廟材也何必是嘉泰紀元十一月除建康府  
教授樞密丘公崇留守陪都於僚屬中重許可一見公  
遇以國士開禧二年六月樞密丘公宣撫江淮辟公克  
準備差遣公處幙中凡所贊畫皆一時急先之務郭倪  
守維揚調民兵萬餘城守皆占民廬盛夏不釋痠癘大  
作公言虜未至何自苦居民如是遂白丘公即釋之歸  
去者驩聲雷動居者炷香于門伺公出舉手加額曰此  
宣幹賜也八月陞克幹辦公事丘公尋開督府公有募  
兵之命循江而上所選皆精悍時虜騎入寇傳言恟恟  
淮民多渡江公建四策以處之有故土者官給以糧令  
還本呈勇敢願爲軍者籍之無土著者給糧令散居各  
謀生計有馬牛出鬻者官出鏹爲市烙以火印俟寇退  
明春給復之母令射利者容其姦凡區畫合宜者公之  
策居多嘉定二年二月以薦及格改宣教郎知臨安府  
富陽縣四年十月公始至代者以邑之豪猾姓字授公  
公緘而束之高閣曰吾未欲知其名也使聞而改過足  
矣秩滿啓視則靡有一造庭者公先教後政感人動物  
率若是六年歷二考餘治狀彰著當路名公交薦三  
十疏七年二月除主管官誥院八年三月除宗正寺簿



時旱公上言曰比年以來災異不一向也旱虜今及吾  
邊春既告旱夏必傷潦不惟此爾乃去歲之秋月食望  
日食朔而金星見晝鎮星失行太陰躔高木星度下  
類非細變也可不震惕如禍在朝夕哉臣願 陛下剛  
健輝光日新其德蠲苛賦以培國本去繁刑以壽國脉  
顯忠消佞以厲臣節言聽諫行以作士氣一政令之設  
施必曰其事果合於天否乎一人才之黜陟必曰其人  
果當於天否乎天心何自知之當人心則當天心矣盖  
轉移其象消弭其災非大有以飭厲之未見其可也尋  
輪當陞對上言曰臣聞覘人之國者不以其兵之強國  
之富土地之廣而惟以風俗觀之西漢之末士大夫崇

議論之美而乏經理之用儒者不畔六經之說而流爲  
虛文州縣有惠養之名而未有經久之政邊方無目前  
之警而有不可測之虞譬之蒲楫維舟容與安流一旦  
風濤未知所屆古之人君知天下之將有事也必陰求  
傑特之才儲之以爲他日之用盖平居無犯顏敢諫之  
士則臨難無伏羲死節之人漢之王陵周勃汲黯皆有  
三代之遺直至若公孫弘輩則如發蒙耳緩急何賴焉  
人才之生無間今昔上有所好中才激昂惟 陛下重  
圖之寧宗溫顏開納六月除樞密院編脩官九月差校  
上舍試明禋公克讀冊官禮畢寧宗忽問宰臣曰頃讀  
冊文語音清徹者爲誰宰臣以公對寧宗深器重之九

年四月兼權右司郎官輪當陛對公上言臣聞天之道日運而無積聖人之治日新而不窮陛下更化之初固嘗登正士以革姦庸伸讜言以破諛佞以祖宗之法而塞徼倖之門嚴責實之政以變欺誕之習風行雷動固已月異而歲不同矣然物以久而故人以久而玩誠能因已定之規模而加作新之功則黜陟所形而天下竦其好惡賞罰所及而天下震其威明搜遺拔異以收僉屬之心聽言行諫以昭容受之實闢功名之塗而使人人有欣欣不自己之意示信必之權而使天下不敢萌苟且之風則治日新又日新雖至萬世而無弊可也夫苟一切安於逸豫則強者必弱智者必晦敢言者必緘嘿有志者必退縮天下之治蓋未知其所終矣又曰臣聞自天地肇分以來有中國則有戎狄由五胡迄元魏而後奄地之廣傳酋之多未有若女真者肆我祖宗得請于上帝假手韃靼連歲屏除岌岌之勢千鈞一髮矣然一狄亡一狄生而又中原姦豪與夫乘時姦夫變出湏臾患生盤糾風塵翕忽平定難期蓋中原腹心也吳蜀荆襄四肢也腹心受病未有四肢獨安者其可不重勤聖慮哉甲子之夏辛棄疾嘗謂臣言中國之兵不戰自潰者蓋自李顯忠符離之後始百年以來父以詔子子以授孫雖盡徠之不爲衰止唯當以禁旅列屯江上以壯國威至若渡淮迎敵左右應接則非沿邊土丁

斷不可用蓋沿邊之人幼則走馬臂弓長則騎河爲盜其眎虜人素所狎易若夫通泰真揚舒蘄濡涇之人則手便犁鋤膽驚鉦鼓與吳人一耳招之得其地矣又當各分其屯無雜官軍蓋一與之雜則日漸月染盡成棄甲之人不幸有警則彼此相持莫肯先進一有微功則彼此交奪反戈自戕豈暇向敵哉既知屯之不可不分又當知軍勢之不可不壯淮之東西分爲二屯每屯必得二萬人乃能成軍淮東則於山陽淮西則於安豐擇依山或阻水之地而爲之屯令其老幼悉歸其中使無反顧之慮然後新其將帥嚴其教閱使勢合而氣震固將有不戰而自屈者又如臣言謀者師之耳目也兵之勝負與夫國之安危悉繫焉而比年有司以銀數兩布數疋給之而欲使之捐軀深入刺取虜之動息豈理也哉於是出方尺之錦以示臣其上皆虜人兵騎之數屯戍之地與夫將帥之姓名且指其錦而言曰此已費四千緡矣又曰虜之士馬尚若是其可易乎明年乙丑棄疾免歸又明年丙寅始出師百年教養之兵一日而潰百年葺治之噐一日而散百年公私之蓋歲一日而空百年中原之人心一日而失鄧有龍敗朝廷以丘密代之臣從丘密至于淮甸目擊橫潰爲之推尋其由無一而非棄疾預言於二年之先者所集民兵皆鉏犁之人拘畱維揚物故幾半臣言之密一日而縱去者不啻萬

人此蓋犯招兵不擇之忌也禁旅民兵混而不分爭泗  
攻壽相戕殆盡此蓋犯兵屯不分之忌也兵數單練分  
布不敷人心既寒望風爭竄此蓋犯軍勢不張之忌也  
十月晦夜虜人以筏濟兵已滿南岸而劉世頭等熟計  
不知倉皇授甲一鼓大潰又犯謀候不明之忌也丘密  
經理魯未三月而虜騎已渡淮矣夫往者之轍來者之  
鑿也覆而不鑒則又前轍耳今日之事固與前日大異  
向也一於謀人今焉專於自治九重之所宵旰廟堂之  
所經理將帥之所舉行無一日而或忘也而臣區區之  
意竊謂邊方事宜誠難遙度伏願 陛下詔諸將使之  
相度山川形勢覽觀丙寅覆轍上而川蜀中而襄漢下

而兩淮凡彼之所必攻而我之所當備酌其輕重量其  
緩急大綱細目俾各以所見條具來上朝廷爲之斟酌  
而行之如其所欲爲而責其成功不及今無事之時使  
之得以盡其所欲言一旦有故彼將曰某城朝廷所築  
也某兵朝廷所屯也某寨朝廷所脩也某池朝廷所浚  
也力盡於不當爲之所而功遺於所當用之地非吾所  
預知也於是得以有辭矣昔之英主駕馭將帥或面詰  
或疏問使之空臆盡言因得以第其才能而占其成否  
皆若是也至若關宗社之大計圖不世之偉功則固有  
李德裕處回鶻之事而可以弭後患种世衡自任邊方  
之責而不以累朝廷此則未敢遽言也蓋禮樂征伐自

天子出惟至神獨斷之十二月除秘書丞依舊兼權右  
司郎官公連歲班朝屢求外補十年四月除江東運判  
昇節鄉部時以爲榮陛辭寧宗謂宰臣曰程秘豈可容  
其補外遂復以舊職番公之處都曹也凡郡國獄讞之  
來上者必審克之每夜分不寐多所平反一時公論獨  
歸重焉六月丁內艱十二年九月服除或援舊比勉公  
以姓字通當軸公曰吾生平所守直道耳况今憂患之  
餘寧復干進哉十月除浙西提舉謝表有云平生疎樸  
既懶趨驃騎之門咫尺寒温亦罕至長安之第於此可  
以見公之心矣部民投牒旁午公隨至剖决靡有遁情  
逮建臺以激濁揚清爲己任一道聳然公帑浮費節以  
制度以餘積下屬郡增常平廩預備荒札治最上聞十  
三年十月瑞慶節公以畿內使者隨班稱壽寧宗惜其  
去復除秘書丞兼權右司郎官十四年正月除秘書省  
著作郎兼職如故六月除軍器少監兼職如故尋兼權  
侍立脩注官八月除國子司業兼國史院編脩官實錄  
院檢討官兼權直舍人院公以宿望掌教成均命下之  
日六館之士咸以獲遂執經爲幸九月除起居舍人兼  
職如故十五年九月除權尚書吏部侍郎兼同脩國史  
實錄院同脩撰兼權中書舍人公持銓衡惟公惟平人  
不可干以私雖軋以權勢亦不爲動但應之曰此銓法  
也十六年正月差知貢舉禮闈得人爲盛撤棘入見奏

謝寧宗玉音再三褒獎十七年七月除守禮部侍郎兼直學士院薇垣史館兼職如故閏八月初三夜理宗即位十月除兼侍讀講筵肇開公上言曰臣聞人主之學貴乎力行而已傳說之告高宗曰非知之艱行之惟艱又曰王人求多聞時惟建事夫知而必見於行聞而必見於事是豈徒知徒聞哉三代而來英君詎辟知以講學爲務者其功業必見於天下至於叔季之世豈無聰明之君惟其不務人君之大德而好文章之小技至與臣下較工拙於一章一詠之間而紀綱陵遲政刑敗壞生民塗炭則未嘗一過而問焉夫如是又何取於學哉我宋龍興聖聖相繼觀堯舜之用刑而深懲近代之密網我藝祖豈徒學乎觀周公之無逸而重戒人主之自豫我仁皇豈徒學乎觀大禹之勤儉而力非人主之貪心我孝宗豈徒學乎先皇嗣統仰法明謨推其所學而見之躬行用能三十一年之間方內乂安舊疆浸復是皆學形於治而治本於學也恭惟陛下飛龍在天萬物咸覩既能以講學爲先必能以躬行爲急凡經訓之垂史冊之載事之涉於事親者必反覆講明而躬行於寧神養志之間事之涉於進賢斥佞者必反覆講明而見於觀人察士之際事之涉於嚴監司牧守將帥之選者必反覆講明而見於博採公言之時凡事之關於治體涉於教條必明辨審思而力行之若夫多聞以爲博多

見以爲富無益也夫如是則智慮堅定聰明益開措之  
政事功業日隆上天眷休與宋無極玉音稱善久之是  
月除權刑部尚書兼職並如故經筵進讀因呂蒙正論  
唐末命令出於輔臣公奏曰唐自天寶以後元宗恃天  
下之富盛不復留意於治故舉天下事悉付李林甫德  
宗付之盧杞穆宗付之李逢吉敬宗以後尤不足道狎  
近小人舉國以聽此唐祚所以衰也然唐虞三代何嘗  
不任其臣但問其所任得人與否爾上曰所陳極是又  
問太宗寶訓云治世少而亂世多君子少而小人多何  
也公奏曰先正有言自五帝立經陳紀以來至於本朝  
凡四千餘年其間治平僅三四百年爾其餘非昏闇之  
時卽弱削之時非弱削之時卽危亡之時然治世所以  
少而亂世所以多者正緣君子少而小人多也然天未  
嘗一日不欲天下之平治也聖君出則君子多庸君出  
則小人多爾天顏大喜以爲極是極是又因進讀祖宗  
文章筆札卷畢公奏翰墨詞章固帝王之能事然堯舜  
之文具存二典寂寥數語無非治要至論書法則太宗  
之留意詞翰實在僭國削平之後真宗之銳意文墨亦  
在澶淵却敵之餘今日所甚急者民力未裕更當擇監  
司兵力未振更當選將帥士習未美更當明政刑區區  
翰墨詞章豈足爲陛下進上曰朕每聽鄉所言最爲詳  
明寶慶政元十月除試禮部尚書以身兼二制力辭西

掖得請仍兼直學士院兼侍讀陞脩國史實錄院脩撰  
又因進讀太宗謂近臣曰方今四方所入財賦兩倍唐  
室公奏臣竊攷淳化間乃天下極盛之時而財賦之入  
一歲止一千六百餘萬元豐增至五千萬然是時三百  
餘州也南渡以後二百州一歲之賦乃六千餘萬比國  
初增五倍比元豐又增一倍矣然邊未撤警國用未裕  
取之以此數百姓固知朝廷之不得已也最是州縣之  
吏又從而取贏焉民困愈重矣要湏時取其甚者而警  
飭之庶幾百姓其少瘳乎上深以爲然時因霽雨公奏  
雨與水皆陰類也外而戎狄內而寇盜皆所當慮所謂  
應天以實不以文者陛下恐懼警省側身脩行固所當

畫如玩乾而自強玩威而虛受玩順而節飲玩損而窒  
慾以至法堯之求賢而吁於用鯨法舜之達聰而深於  
惡讒法文王之憂勤而日昃不食法商宗之無逸而享  
國久長而其見於政事者尤當加意今民貧極矣而州  
縣不恤兵貧亦極矣而將帥不恤要當謹簡監司以恤  
民嚴飭將帥以恤兵然後建重鎮以新觀聽擇老將以  
專節制益戰士以壯軍容厚犒賞以作士氣使吾之根  
本益壯精神益強則守可也和可也攻亦可也無往而  
不可焉易歎爲豐化菑爲祥特反掌爾而又何戎狄寇  
盜之足慮耶且昏墊之菑未有甚於堯之九年者而堯  
廷之上大綱小紀日事整飭焦烈之害未有過於湯之



七年者而有商君臣脩明政刑儻然若不欲以終日古人之畏天一日爲一日之功一歲計一歲之功若則斷斷行之天則斷斷應之天人相與之際捷於影響上日踰月任講不勝渴想今聞鄉講論頓覺豁然二年正月上御經筵命公再知貢舉八月兼權吏部尚書十月除翰林學士知制誥兼脩玉謨官仍兼侍讀時翰苑自參政樓公鑰而後虛其選者二十有一年逮公拜命中外莫不榮之三年十一月因經筵進讀公偶爲風寒所侵上眷優隆賜湯液賜蠶火賜薑粥天使絡繹拊問人皆知上有柄用意而公知有忌者會有長子戚遂決意告歸力伸祠請上荅詔不允挽番甚力公請至於四五紹

定紀元三月上不獲已從之除煥章閣學士知建寧府公以祈閒得郡殊非本心遂再力辭上仍荅詔不允公遂黽勉于行七月至郡奉行寬大崇化厚俗期與千里相安於無事聽訟燭見隱微豪猾無得逞屬邑官賦不事苛迫時叅政真公德秀家居以書達公曰人稱三四十年來無此賢太守二年汀邵盜作諸臺以言論異同由是賊勢猖獗汀之寧化南劔之沙邑邵武之建寧光澤皆莽爲丘墟駸駸迫汀邵城治七閩繹騷十一月除公招捕使節制軍馬時建寧承平日久禁卒額雖千餘而罕知兵革調遣他郡則皆以城守爲辭公遂就本郡禁卒中選精悍者仍剗翼虎飛熊二軍招刺強勇三千

人擇土人知兵者訓練統率而前以紓二郡之急且用  
間謀離其徒黨使之自相屠戮捷奏日聞大酋二十納  
款投降平定有期而閩漕懷舊恨忌公成功乃以坑降  
疑群盜盜素服公威信不以為然公念間從中起何以  
底績於是屢上祠請且薦陳公譚以自代三年三月以  
煥章閣學士提舉隆興府玉隆萬壽宮公歸途經浦城  
真公德秀迓于遠郊謂公曰玉堂既去一路失此賢師  
帥其將疇依乎公還故山日相羊于泉石手不釋卷每  
以未老得閒為樂四年二月時李之孝在諫坡以公守  
建日嘗有私謁公弗從遂妄諛毀去職與祠公處之泰  
然端平紀元上親攬權綱厲精庶政之孝貶斥除公敷

文閣學士提舉隆興府玉隆萬壽宮公上免牘答詔不  
允詔詞有曰屬躬攬於政權尤匪輕於名器卿夙儀禁  
近備整忱恂茲妄想於典刑肆亟放於綸綍告詞又曰  
久不見生諒未究設施之蘊何以告我尚有資啓沃之  
忠蓋用公之意未艾也嘉熙紀元四月除知寧國府二  
年六月除知贛州公懇辭甚力上皆從之仍奉舊祠三  
年正月除寶文閣學士祠廡如故六月除知福州兼本  
路安撫公上免牘尋拜不允之詔然公倦於出再力伸  
祠請遂復以舊職奉祠淳祐紀元四月除龍圖閣學士  
奉祠仍舊公歸自建以寵榮為懼故頻歲以來納祿之  
疏不知凡幾上每答詔不允詔詞有曰卿昨告老朕不

欲強卿一來姑畀祠廩茲又抗牘祈遂謝事甚非所以  
體朕也矧卿嘗爲朕甘盤矣何至遽起掛冠神武之想  
乎其勿出此二年四月洊騰告老之章懇請愈切上方  
俞其請除端明殿學士依所乞致仕公累載告休一朝  
得遂喜形于色第以端殿殊恩詎容遽拜又上免牘上  
復荅詔不允公遂拜命日以登臨自娛六月八日偶覺  
伏暑越宿已康復屏藥却醫起居飲食對客笑言無異  
常時十有三日忽呼子暨孫列于前語之曰吾奮由儒  
素受知兩朝年幾八袞一無可憾所望者爾曹力學自  
脩則吾雖亡猶生爾無一語及家事言已薨于正寢公  
生於隆興甲申八月二十日享年七十有九遺奏聞上

恩贈特進少師與致仕遺表恩澤訃音之傳士大夫識  
與不識皆有天喪斯文之嘆有洛水先生文集六十卷內制  
類稿十卷外制類稿二十卷藏于家公生平以成就人  
才爲己任預薦進者登揆席叅政機班法從居臺諫皆  
爲當世名臣惟冲澹無聲色奉每戒家人用無過侈服  
無過率至姻族閭里貧不克振周之惟恐或後義方訓  
嚴諸子刻志問學平居暇日常謂其子曰吾他時終于  
牖下當斂以時服衣裳之外他無所事也厚葬古人所  
戒非徒無益適爲累爾爾曹識之淑人之斂黃白緇銖  
不內諸匱公娶金華王氏封淑人丞相文定公淮之長  
孫女生於相門不以富貴自驕簡靜端莊動由禮法先

公一年卒實元年二月十一日也享年六十八子三人  
若水承事郎監鎮江府寄樁庫若曾承奉郎兩浙轉運  
司造船塲計置物料官俱先沒若愚宣義郎前饒州德  
興縣丞孫男四人其載蚤亡其廔承奉郎監臨安府糧  
料院其深其仁並承務郎未銓曾孫二人通孫振孫曾  
孫女一人公之孤將以三年十一月三十日壬申窆公  
於休寧縣和睦鄉萬松山之原遵治命也蓋嘗論賢哲  
之生氣稟必異故見諸躬行發諸詞章措諸事業亦決  
非世俗所企及惟公天稟清高離倫絕類已見於齟齬  
賦米時其持身介然有守挺然特立名流莫不皈敬競  
欲締交而後學有志之士則皆尊之仰之以爲模範於

書無所不讀發而爲文自成機杼神韻絕出故落筆妙  
天下援引今昔博學之士不能究知其詞雅健精深追  
逮古作根本義理扶植名教有補於當世學者誇傳而  
爭誦之論奏皆剴切當上意雖經綸抱負不獲盡展于  
世而兩朝眷渥始終弗替凡此皆近世所罕見午州里  
晚生夙蒙公異知試邑餘杭時公爲禮部尚書以廉相  
舉故又於公爲門下士歲在乙未孟冬午扶護先大夫  
歸葬方抵里中未及伸致哀挽之請公首賜長篇以爲  
存沒之榮是豈可忘哉今公襄事有日前期若愚書來  
曰先公生平出處相知深相與厚莫若子敢以行實一  
編丐定次將告諸大史氏以信今傳後午何敢以不韙

辭謹具如右謹狀

淳祐三年十月

日朝議大夫行監察御史門生欽

呂午拜書

程端明公洛水集卷之二十五

程端明公洛水集卷之二十六

裔孫夢龍刻

附錄

誌 傳 記 啓 序 祝 帖 述

宋故端明殿學士宣奉大夫贈特進少師程公墓誌

孤子若愚泣血拜述

先君諱秘字懷古世籍徽之休寧曾祖諱自誠祖諱會  
亨考諱文夷故承務郎致仕累贈宣奉大夫先君生隆  
興甲申八月二十日午時紹熙四年擢進士第授迪功  
郎主臨安府昌化簿秩垂滿丁外艱嘉定紀元服除十

一月除建康府教授開禧紀元正月服闋陞從政郎二年  
六月辟充江淮宣撫使司準備差遣八月陞幹辦公事  
嘉定二年二月以薦及格班改宣教郎知臨安府富陽  
縣三年五月米餽賞轉奉議郎六年二月磨勘轉承議  
郎七年二月以政績上聞除主管官誥院八年三月除  
宗正寺簿六月除樞密院編脩官九年二月磨勘轉朝  
奉郎四月兼權右司郎官十二月除秘書丞兼職如舊  
先君以連歲班朝屢求外補十年四月除江東運判官  
辭寧宗謂宰臣曰程秘豈可容其補外遂復舊職六月  
丁內艱十二年九月服除十月除浙江提舉十一月茶  
鹽賞轉朝散郎十三年五月磨勘轉朝請郎十月除秘

書丞兼權右司十四年正月除秘書省著作郎兼職如  
舊五月秘書省進書轉朝奉大夫六月除軍器少監兼  
職如舊是月兼權侍立脩注官八月除國子司業兼國  
史院編脩官實錄院檢討官兼權直舍人院九月除起  
居舍人兼職如舊閏十二月經筵徹章轉朝散大夫十  
五年三月璽恩轉朝請大夫四月捧寶賞轉朝議大夫  
九月除權吏部侍郎兼同脩國史實錄院同脩撰兼權  
中書舍人是月磨勘轉中奉大夫十六年正月差知禮  
部貢舉十七年三月茶鹽賞轉中大夫磨勘轉太中大  
夫七月除守禮部侍郎兼直學士院薇垣史館仍兼領  
之九月登極恩轉通議大夫是月除兼侍讀尋除權刑

部尚書兼職並如舊明禋恩封休寧縣開國男食邑三百戶寶慶元年九月除試禮部尚書陞兼國史實錄院脩撰翰苑經筵兼領如舊二年正月再差知禮部貢舉八月兼權吏部尚書十月除翰林學士知制誥兼脩玉牒官仍兼侍讀三年九月份筵徽章轉通奉大夫十二月郊霈進封開國子食邑六百戶紹定紀元正月以伯兄之戚抗疏丐祠荅詔挽晉甚力疏凡五上情詞益篤四月上不獲已始畀俞音除煥章閣學士知建寧府二年汀邵寇張十一月除福建路招捕使節制軍馬先君威信兼用平定有期而閩漕懷舊憾忌成功乃以坑降疑群盜盜素服威信不以爲然先君念間從中起於是

累疏丐休三月以煥章提舉隆興府玉隆萬壽宮四年二月朔明禋恩封進開國伯食邑九百戶端平紀元除敷文閣學士奉祠如舊五月東朝慶壽恩轉正議大夫七月磨勘轉正奉大夫嘉熙紀元四月除知寧國府二年六月除知贛州皆辭不赴是年明禋恩進封新安郡開國侯食邑一千二百戶三年正月除寶文閣學士奉祠如舊六月除知福州兼本路安撫先君倦於一出上免牘者至再乃以寶學奉祠四年四月明禋恩食邑一千五百戶淳祐紀元四月除龍圖閣學士奉祠如舊先君頻歲以來告老之章無累十數上眷優隆荅詔屢不允二年抗章愈切期得請而後已四月除端明殿學士

依所乞致仕命下之日喜形于色曰吾幸遂掛冠庶無  
媿於知止之義矣日以登臨爲樂康健如平時季夏十  
有三日倏以微恙薨于正寢嗚呼痛哉享年七十有九  
遺奏聞上恩贈特進與致仕遺表恩澤先妣金華王氏  
封淑人丞相魯國公諱淮之長孫女先一歲卒寔元年  
二月十一日也子三人若  
郎監鎮江府寄椿庫  
若魯承奉郎監兩浙轉運司  
場計置物料官俱先  
歿若愚宣義郎饒州德興縣丞孫四人其載蚤亡其垵  
承奉郎新監臨安府糧料院其深其仁並承務郎未銓  
魯孫二人通孫振孫曾孫女一人若愚忍死以三年十  
一月三十日奉柩窆于和睦鄉百萬松山之原遵治命

也先君夙穎天成不煩雕琢十歲詠冰已有莫言此物  
渾無用魯向滹沱渡漢兵之句迨弱冠於書無不讀研  
窮義理洞徹精微千古治亂歷歷舌端發而爲文出自  
機杼蚤由鄉薦旅試南宮時丞相趙公汝愚典舉一見  
先君之文曰天下奇才也擢之以魁多士中有儉人擯  
斥道學疑先君嘗遊於其門私意置第二公論扼腕隨  
牒推移手不釋卷履行端方挺然特立道德詞章獨步  
當時由是受封兩朝獻忠論思奏疏忠確言不苟合論  
利害不盡不止司內外制者八年凡片言隻字之出學  
者爭先覩之以爲模範癸未丙戌連知貢舉南渡以來  
所未之有晉情攷校夜分不寐撒棘入謝玉音嘉獎有



曰卿典舉甚勞中外皆稱得士爲國得人可立太平之  
基他日用之不竭又爲國家無窮之用皆卿之力至若  
經筵進講密啓上前尤爲剴切玉音褒諭非一或曰朕  
每聽卿所言最爲詳明或曰任講餘月不勝渴想今聞  
卿講論頓覺豁然生平處性冲澹自奉薄甚由建寧來  
歸家食十有三載相羊泉石惟以典籍自娛待人接物  
溫乎其和急義樂善終始蓋一轍也薨之日鄉閭哭者  
交道公卿大夫識與不識莫不悲傷先君推世繫本河  
北洛州自號洛水遺民學者尊稱之曰洛水先生有文  
集六十卷內制類稿十卷外制類稿二十卷行于世痛  
惟先君嘉言善行未易殫紀茲薄窆期姑叙梗槩納諸

幽宮詳則太史書之

縣志傳

篁墩程敏政

程秘字懷古汧川人十歲吐詞有奇語紹熙四年登進  
士第時趙公典春官見其文曰天下奇才也擢魁多士  
有以道學疑者寘第二授臨安府昌化簿應博學宏詞  
科除建康府教授開禧初樞密丘崇宣撫江淮辟充幹  
辦改知富陽代者以邑之豪猾名字授秘秘束之高閣  
曰吾未欲知其名也使聞而改過足矣秩滿啓視則靡  
有一人造庭者用薦除宗正簿因早上言比年以來災  
變不一願陛下剛健光輝日新其德蠲苛賦以培國本  
去繁刑以壽國脉顯忠消佞以厲臣節言聽諫行以作

士氣輪對復上言覘人之國者不以其兵強國富土地之廣而惟以風俗觀之古之人君知天下之將有事也必陰求傑特之才儲以爲他日之用故平居無犯顏敢諫之士則臨難必無伏節死義之臣惟陛下重圖之寧宗嘉納除樞密院編脩官兼權右司郎官上言女真爲韃靼所乘蓋一髮千鈞矣然一狄亡一狄生而又中原姦豪患生盤紆夫中原腹心也吳蜀荆襄四肢也腹心受病未有四肢獨安者可不重勤聖慮哉丙寅出師一敗塗地蓋犯招兵不擇兵屯不分軍勢不壯諜候不明之忌惟陛下申詔諸將各以所見條具來上而斟酌行之不及今無事之時盡所欲言一旦有故彼得有詞矣

遷秘書丞屢求外補上謂宰臣曰程秘豈可容其補外丁內艱服闋除浙西提舉以治景聞除秘書省著作郎繼除國子司業兼國史院編脩官權中書舍人尋守禮部侍郎直學士院理宗初兼侍讀上言人主之學在乎力行而已三代以來人君知以講學爲務者其功業必見於天下至若叔季之世雖有聰明之君惟其不務人君之大德而好文章之小技亦何取於學哉上稱善上嘗留意筆札秘言太宗留心詞翰實在僭國削平之後真宗銳情文墨亦在澶困却敵之餘上爲悚然寶慶初除禮部尚書兼職如故二年權吏部尚書尋除翰林學士紹定改元以疾乞補外除知建寧府福建路招捕使

時汀邵寇作七閩繹騷玘選禁卒精悍者狝狨虎飛熊  
二軍招刺強虜三千人用間諜離其徒黨捷奏日聞有  
忌之者間從中起玘乃乞祠薦陳鞞自代以煥章閣學  
士提舉玉隆萬壽宮歸途經浦城真公德秀迎謂曰玉  
堂既去一路失此賢師帥柰何未幾以李之孝言落職  
與祠端平初復學士祠祿嘉熙初元除知寧國府二年  
除知贛州三年除福州安撫使三命皆固辭不拜淳祐  
初加龍圖閣學士懇乞納祿除端明殿學士致仕淳祐  
二年卒年七十九歷官宣奉大夫封新安郡開國侯遺  
表聞贈特進少師玘以詞章稱當時世系本河北洺州  
曰號洺水遺民有文集六十卷長子若愚歷官知辰州

遷浙東帥府叅議次子若水監鎮江府寄椿庫若魯監  
兩浙轉運司造船塲計置物料官

郡志傳

杏庭洪焱祖

程端明玘字懷古休寧人都使灑十五世孫甫十歲詠  
冰有句云莫言此物渾無用曾向滹沱渡漢兵識者奇  
之舅氏黃寺丞何察玘非常兒挾以自隨以平生所得  
二吳俯倣之學及有聞於程大昌者盡以授之由鄉薦  
試南宮魁多士登紹熙四年進士第知富陽縣除宗正  
簿權右司郎官遷秘書丞屢求外補寧宗謂宰臣曰程  
玘豈可容其補外除秘書省著作郎國子司業兼國史  
編脩權中書舍人知禮部貢舉尋守禮部侍郎兼直學

士院兼侍讀寶慶改元除禮部尚書翰林學士紹定改元故二年再差知貢舉權吏部尚書翰林學士紹定改元乞祠補外除知建寧府福建路招捕使時汀邵寇作秘威信兼用平定有期有忌其成功者間從中起於是累疏丐休端平初奉祠祿淳祐改元除端明殿學士依所乞致仕年七十九秘以詞章稱當時世系本河北洺州自號洺水遺民有文集卒卷行於世子若愚知辰州從子若顏若疇皆以科第顯孫其垕知容州其仁知武康縣

一統志傳

文達公李賢

程端明秘休寧人紹熙中進士授昌化主簿累官權吏

部尚書拜翰林學士立朝剛正風裁凜然進封新安郡侯以端明殿學士致仕卒秘居家常平糶以濟人凡有利於衆者必盡心焉所著有洺水集

休寧縣脩學記

秋崖方岳

學校與井田並古未有去井田而爲學者也故自五家之比鱗屬而午貫之於是乎家有塾黨有庠術有序此非古所謂鄉校歟族有師州有長鄉有老此非古所謂鄉先生歟士生其時出則相耦於同井之出入則相友於同門之學蓋知父吾父子吾子老吾老幼吾幼而已然而堯舜禹湯文武之道具是焉井田壞學校廢士之羸糧外遊者無方而專門名家之學興大帥衆至千餘

人其不違父母舍墳墓而去者幾希而人心始漓故漢之號爲儒者其下者爲桓榮之稽古其高者爲鄭康成孔安國之訓詁又高者爲董仲舒之明天人而止爾三代之所以一道德同風俗者不在是國朝學校之盛布滿郡邑雖田不井授而欲士之不去其鄉而爲學則猶古也休寧壯哉縣其道經訓以相傳習者率嘗最吾州異時校官有望府溟滓然第之者蓋錫山陳公之茂尉邑時之爲也於今百有六年矣厥棟維摧厥甍維頽瞻言宮庭士頽有泚歲時舍菜僅僅無落事而已內翰程公之歸里也一大葺之言言新宮殆不舊翅是歲岳起家入掌故道休陽聞公之言曰是鄉校也吾長於斯學於斯而可諉吾父兄子弟爲聞士之謂公者曰是鄉先生也學如此其行也仕如此其亨也而可忘吾父兄子弟爲然則公之興學校雖微井田其猶井田意歟邑大夫吳君遂與凡有職於學者交謁更進而屬記于岳辭不可則諗于衆曰聖有大訓言忠信行篤敬雖蠻貊之邦行矣言不忠信行不篤敬雖州里行乎哉然而行於蠻貊者易行於州里者難獨何與州里得之於其常蠻貊得之於其暫暫者易勉而常者難持也士固有冠冕佩玉天下之通貴而不爲鄉士大夫所齒者矣月旦之評其可畏如此故士之所以脩其身者愈近則愈難事容可以欺天下而不可以欺婦子也夫子之所以聖不

過鄉黨一書而所謂治國平天下者無餘蘊矣諸君能  
耕而遜畔則畝畝而伊周能行而後長則道途而顏冉  
奚必曰稽度數訓詁以爲博談性命以爲高而後謂之  
學哉是則鄉先生所望於學校之意也皆曰唯敢不夙  
夜敬戒以無忘公之德公名秘字懷古先皇翰林學士  
今爲端明殿學士提舉嵩山崇福宮云

嘉熙五年庚子 月 日

休寧縣學端明程公祠記

通直郎知休寧縣主管勸農營田公事弓兵軍正

趙師岩撰

藝祖皇帝膺天景命治啓文明列聖守之代有哲人維

持之徽輔郡海寧壯縣人物膺碩師岩所聞稔矣淳祐  
癸卯秋承乏此來首謁學宮搦齋禮殿巍巍堂堂懔然  
加敬問孰爲之則曰特進端明程公也師岩竊謂夫子  
之道若揭日月固無所待而尊然肩伉弗嚴觀瞻曷竦  
公當代重望厭直承明以斯道爲己任故於桑梓之鄉  
昭示宏撫如此使端拜其庭者仰而視俯而思推以福  
斯民壽國脉其功用遠且大矣昔畏壘之化民猶社而  
稷之載稽先達待制凌公以節尚書金公以德尚書陳  
公以有功校官故通得祀矧禮殿崇成增輝疇曩是道  
亡窮則是殿亡窮是殿亡窮則公之祀當與之亡窮也  
師岩才不類於學道愛人之訓擁有志焉涖事三月割

俸入佐東序工役費餘有待也每瞻公祠歛衽感心爰  
加脩飭以嚴祀事公諱秘字懷古洛水其自號也爵秩  
功業具在國史初公草殿記以列功緒俟訖後刻之亡  
何公薨明年公之子宣義郎前知饒州德興縣丞若愚  
孫承奉郎新監臨安府糧料院其焜篤紹先志悉力畢  
事貽書于學摹之堅珉且日記出絕筆其敢一字改宜  
有續志以著厥詳因訪顛末知其族子若沔其弼嘗有  
襄言以嫌弗書學賤程恒吳必大程寶汪開汪孫余逢  
原夏之時曹應西吳季用查雷奮吳駙吳大成吳紹祖  
朱中吳大經程鱗韓光魏吳墉吳惟志江岳金準吳園  
汪洪相與翼成之郎記所謂程雷震等五十人者記大  
居正書法也續志欲詳廔德也用班氏凡例不一書抑  
以成善述之美也

淳祐四年甲辰五月

日

休寧縣鄉賢祠記

賜進士及第資政大夫禮部尚書前翰林院侍讀學  
士兩京國子監祭酒蜀人周洪謨撰

賜進士出身巡按南直隸文林郎監察御史蘭亭司

馬堽書

中順大夫太常寺少卿掌欽天監事郡人康永韶

篆

南畿諸郡縣學皆有鄉賢祠惟休寧缺成化壬寅秋縣

尹歐陽旦承巡按御史婁君檄文創設祠宇以祀歷代  
之有德善者既畢工乃寓書於予求爲之記所祀凡二  
十人謹按唐宋元史及郡縣志以述其德善梗槩唐御  
史中丞歙州都知兵馬使程公湮英敏強毅保障州里  
宋龍圖閣待制查公道孝事父母仁及宗族尚書屯田  
郎中曹公矩孝感芝生詔旌宅里龍圖閣待制贈少師  
洪公中孚秉身剛正不畏強禦敷文閣學士贈少保金  
忠肅公安節孝友忠直全名高節南京留守贈徽猷閣  
待制凌公唐佐捐軀爲國忠節凜然吏部尚書贈少師  
程文簡公大昌好學博古政績顯著柳塘先生汪公莘  
履行素高遯世不怨廣南西路安撫吳文肅公徹志氣  
軒特忠義果斷同知樞密院事贈資政殿大學士程正  
惠公卓守郡有德民爲立祠工部侍郎贈宣奉大夫朱  
公晞顏至性友愛仕多惠政端明殿學士贈少師程公  
秘才華無敵治最有聞勿齋先生程公若庸累主師席  
克成士類元定字先生陳公櫟發明理學有功朱氏道  
川先生倪公士毅潛心求道訓釋格言建德路判官兼  
義兵萬戶吳公訥負才倜儻迭有戰功 國朝贈開國  
輔運推誠宣力武臣榮祿大夫柱國安定侯程忠愍公  
國勝累破群賊爲國死難東山先生趙公沅沉潜理學  
講明聖經翰林侍講學士朱公升啓迪後進贊襄 聖  
謨兵部尚書贈太子少保程袞毅公信操履剛方材能



茂著是諸君子出處雖不同而或爲孝友或竭忠蓋或  
慎操履或建功業或迪後學或澤黎庶是宜後人仰慕  
而崇奉之也雖然仰慕而崇奉之者固見其賢賢之良  
心孰若師其人乎苟師其人能效是則將見可以繼前  
休而並垂耀矣使徒祠之而不能師焉則雖日陳籩簋  
亦何所益哉因併書此以俟後之君子

明公其十五世孫勿齋先生十六世孫

大明成化二十年甲辰五月既望立石

賀程內翰冬啓

誠齋楊萬里

雲低魯觀紀葦萊一字之書日麗魏宮詠刺綉五文之  
句瑟彼賓瓚蔚乎府庭恭惟 政隨日新身法天運名  
章俊語爭珠星璧月之光義氣仁風回冰谷雪山之暖  
聊復折梅於東閣即看鳴玉於紫宸萬里爭席漁樵邀  
身江海華裾織翠自憐賀客之莫隨凍硯流澌更媿塵  
牋之不琢

賀程內翰知郡啓

西山真德秀

伏以地稱潜府最雄南服之山川天惠仁侯來布東皇  
之德澤和聲交播福祉自臻恭惟某官以道德人爲文  
章牧政先愛養霈然膏雨之蘇枯令肅貪殘迅若雷霆  
之起蟄即宣化承流之施設見調元宰物之規模願協  
恭交亟歸鼎輔坐使蒸菌之稿亦蒙吹律之春德秀適  
以扁門莫繇賀厦飲屠蘇而醉已同農畝之人稱兕觥

而躋莫上公堂之壽

贈梅亭刻洛水集序

徽程氏本忠壯公後自予王父繇徽徙郢徙洪余叔父徙盱粵若稽古譜牒則徽程氏也余幼逮聞王父言初謁來郢時吾家洛水事寧宗爲翰林學士院移文郢州曰是程內翰戶以故家郢若干歲無力後之征前輩不挾貴長敦族誼類如此長讀書臨汝侍洛水猶子徽庵先生道洛水尤詳蓋予家古多奇士近世能以文字行天下者薦紳曰洛水常布曰徽庵然洛水宗歐蘇而其學長於文章徽庵宗程朱而其學源於性理二人自不能以相一徽庵句辨字義眼及文章事讀寧宗遺詔邵

州防禦使某沂靖惠王之子亦朕之猶子則又亟稱所爲文不在漢制下余雖不逮事洛水而見徽庵之尊其文知洛水他日必尊徽庵之性理無疑也然徽庵太極圖所說近思錄字訓講義等作余諸父暨余槩童而習之獨洛水文集不多見徽庵每教余作大文字盍歸求之洛水及余索餘藁徽庵亦茫然無從得歎曰既縷而幽之矣時口授數十首余把筆識之終宋季不及其全至元十有五年余待罪翰苑每有撰著腸枯血指瑟縮不敢書余徐悟徽庵疇昔令予學洛水類前知者一日盡得洛水集若干卷讀之渾厚悠長明白正大蓋其曾孫景山收拾殘文斷墨於名山大川摹刻與天下士共

之有日矣今年春坐行御史府有通州教授程君入謁  
問其鄉曰新安問氏族曰內翰曾孫嘗編註文集者嗚  
呼余遠臨汝十年而始得見洛水之曾孫使來見也無  
所挾余猶將張之况文與理不失其世守年少而志銳  
惜乎余於洛水無能爲後而其言不足見信於世也爲  
書半日所覩聞於先祖於徽庵叔祖者以勉之  
至元二十八年龍集辛卯七月望日族人集賢學士嘉  
議大夫侍御史行御史臺事文海敬書

內翰祠規序

我少師洛水公沒宋淳祐壬寅逮今

皇明正德己巳二百六十有八年矣公墓在本里萬松

山祠在其麓前有浮屠氏宮名覺慈宮南祀唐張睢陽  
北居老子之徒凡屋若干楹蓋昔人欲藉以永公祠而  
立者族賢代相守而葺之今年春孟良志宏等又以奉  
公祠者無常規而或至於弛也率若干人相與立約春  
秋祀公而因生殖以爲脩葺祠墓之計命節述其由噫  
公何以得是於族之後人哉蓋其盛德遺澤之在人心  
者久而不忘故愛甘棠而勿剪望峴碑而墮淚自有所  
不容已耳公孝友在當時自父母兄弟以及立二姊之  
孤若吳若范至今猶歷歷也其政事在維揚則佐樞密  
丘公以一言而活民兵萬餘於疫癘中守建寧則真文  
忠公稱之以爲三四十年來無此賢太守立朝則格心

之論弭變之方制狄之策屢形章奏而彌遠專權誤國  
則備舉敗兵叛卒之由天變人離之實與夫施罷之失  
宜賞罰之不公者公斥其非而極勸其屏徹壅蔽且曰  
左右壅蔽其聰明陷明公於萬世之罪人明公不知前  
日之誤明公者固已無及今日顧堪再誤士大夫有強  
力者既以官爵之故不敢吐氣區區憂國愛君冒昧爲  
言者先焉其言凜如斧鉞切中權奸之病所以不免爲  
彌遠所銜而出守建寧之制下矣噫公居家孝友之誠  
歷官政績之善立朝精白之志昭灼在人耳目若揭日  
星而行中天固無俟予之表彰也茲特因族賢立約祀  
公而述其槩以爲我族後人告若夫祠祀之規與夫保  
終之義具有條約故得畧焉

內翰祠祝文

維年月日族裔孫某等敢昭告于

故宋端明殿大學士少師洛水程公之神 惟公亢宗  
備器柱國名臣雲彩光華瑞先呈於誕日冰吟卓勵志  
已見於童年獻忠歷寧理兩朝推愛及吳范二戚密山  
繼武汭水餘聲振蕩松風自播千年之韻踏歌林月誰  
追百世之踪顧祠宇之猶存儼冠裳之尚在儒林起敬  
族黨興思良辰適屆於仲春薄奠恭陳於爨禮於昭在  
上式竚來歆

脩理內翰祠帖文

直隸徽州府休寧縣為脩理事據二十都三圖民程士  
新狀告前事有先世宋端明殿學士贈少師程公祠宇  
年深傾頽梁柱腐壞思奉 詔書內一欵功臣祠墓損  
壞許令脩理未敢擅便為此告理乞仰族姪孟高用高  
等率族衆各備已財依舊脩理即無干擾平民乞賜批  
示以憑遵守等因據此查得本縣鄉賢祠內有宋端明  
殿學士程公神位每年仲春致祭今告祠宇年深傾壞  
擬合行帖仰本告族衆程孟高等照依帖文內事理前  
去率衆齊心協力照依汪王廟事例各備已財買辦木  
料作急督工照舊脩理不許外人攪擾亦不許徇私因  
而科擾未便湏至帖者

右 帖 帖

仰程孟高用高准此

弘 八月 日  
帖 押

萬松山禁革樵採侵害帖文

直隸徽州府休寧縣為脩理功臣墳墓乞賜禁革侵害  
事據本縣儒學廩膳生員程錫呈前事遵奉

詔書內一欵功臣祠墓損壞子孫無力有司即為脩理  
欽此有先世宋端明殿大學士贈特進少師程公墓原  
蒙

諭葬本里萬松山具載 大明一統志及郡縣志萬松  
山實係偏僻去處其墳塋按臂禁步石人石獸五鳳樓

神道門萃表柱及享堂神厨兩廂基址近年被山隣及附近人家將按臂禁步內地侵墾作園又將神道路路攔占栽種木植自有砌石古蹟及保簿四至見存可証切思祖墓被人侵害為子孫者不宜忍心不顧茲稟族長程惟昌率族衆自備工食照舊脩理誠恐人心不一託諸空言無益于事敢具情詞上瀆伏望念以功臣之故給與下帖着令通都里老照依

大明令定式一品墳塋高一丈八尺禁步從塋心數至邊各九十步神道橫闊一丈二尺丈量立界俾令協力築護禁革侵害罩占及盜葬等情據此看得呈稱功臣祠墓損壞給文脩築事理擬合通行為此除外合行給帖付民人程惟昌等照依帖文內事理即便督同族衆程志宏等從公各備工食照依舊規丈量畝步周圍築護垣牆開通神道不許山隣附近人民縱放牛羊踐踏侵害盜葬承帖人後亦不得因而生事擾害地方俱毋違錯須至帖者

右 帖 下 族長程惟昌准此

正德六年三月 日 典吏王端

帖押

祠墓首末

裔孫霖述

內翰祠在萬松山麓之南宋淳祐癸卯建正祠五間奉祀端明公神主祠前有浮屠氏宮三間宮南有覺慈庵

祀唐張睢陽宮北有真武堂前爲門屋五間北爲樓屋三重十五間以居道士奉香火弘治丁巳族孫士新孟高用高聞官給文率族衆脩理宮祠梁柱皆仍宋舊立程內翰祠戶以供賦乙丑主祠道士程端陽重葺祠宇肖公像以代主嘉靖戊子道士程士環以祠圯壞復募族衆葺而新之周圍繚以磚墻洪武經理絲字一百二十七號祠地貳畝七分五釐東至取山塆五丈西至路及溪南至自田今蓋祠堂北至程阿范等田業程內翰祠又本縣縣學爲專祠以祀公縣令趙師岩記 國朝成化癸卯縣令歐陽公旦奏創鄉賢祠奉公神主合而祀之

端明公墓在本里萬松山中向淳祐二年奉勅諭葬墓前石人四石馬二石羊二石華表柱二石五鳳樓一洪武經理絲字一百四十二號墳山一畝九分一釐七毫東至路西至路及塹南至路及田北至古杯塹業程內翰祠正德辛未族孫惟昌德溫祖敏志宏天錫等聞官給榜禁革樵採侵害復同族衆四圍繚以石塹種松蔭護其新塹自墳心至東量計一十九步墳心至西量計一十五步墳心至南量計三十一步四分墳心至北量計一十五步周圍墻塹共計一百七十二步

程端明公洛水集卷之二十六終

書重刻端明公洛水集後

昔我端明公在宋以竒才魁天下為寧理二朝名臣兩知貢舉司內外制者八年所著有洛水集六十卷內制類藁十卷外制類藁二十卷曾孫教授公景山嘗輯而刻之元季兵燹遺本鮮有得者雜出於新安文獻志及家乘僅數十篇海內誦慕不勝珠沉玉委之嘆嘉靖乙卯春族之預敦本約者咸曰表章先達吾人志也公集久湮安所得梓太叔祖霄



因以其兄霖家藏錄本出示所存蓋六十卷  
僉喜而閱之間有殘缺失次晒乃與叔應元  
以善弟日升姪夢龍更加輯定以公歷官歲  
月次其表疏餘文則各以類相從附公轉官  
制詔及狀傳諸外作為卷二十有六其內外  
制藁僅得文獻志所載七篇別附卷首命工  
鋟梓以永其傳噫公歿距今餘三百年全集  
不可復睹其幸存而未泯者迺復梓於今日  
寧非吾人之幸得執公之役邪在約凡二十

有六人故卷因之分隸焉碁工乃成爰識其  
由于末簡若公居家孝義立朝風節出於詔  
章之外者則有狀傳在

嘉靖丙辰歲五月中浣喬孫元昞頓首拜書



圖

圖

西

